

弘

簡

錄

弘簡錄卷七十

明刑部員外郎仁和弘齋邵經邦學

皇清翰林院侍講學士四世孫遠平校閱

附載

李密

字玄雄信祖君彥

王世充

竇建德

劉黑闥

薛舉

字仁果

附旁企地

李密字玄遠一字法主其先遼東襄平人曾祖弼魏司徒賜姓徒何氏入周爲太師封魏國公祖暉邢國公父寬隋上柱國蒲山郡公家於長安密初爲左親衛大都督東宮千牛備身煬帝見其碩銳所方瞳子黑白明澈謂字文述曰此兒顧眄不常無令入衛述以語密言君當以才學顯何事區區三衛間哉遂謝病去益感厲讀書從包愷於緱山以蒲羈乘牛挂漢書一帙

角上行且諷楊素適見之問何書生勣乃爾密議素下拜問所讀曰項羽傳因下車與語奇之既長趣解維遠多策畧散贊禮賢不自愛籍素子玄感稱其識度非嘗自此傾心結納私相語曰隋曆不長上多猜忌一日中原有警公與我孰爲後先密曰決兩陣之勝噫嗚咄嗟誓敵降賊我不如公擊天下英雄馭之使遠近歸屬公不如我及玄感舉兵黎陽遣人入關迎密密至陳三計曰天子遠在遼左去幽州千里南限巨海北阻彊敵號令所通惟榆林一道若鼓行入薊直扼其喉不旬月齋糗乏竭舉麾召之衆可盡取然後傳檄而南天下定矣此上計也關中四塞之地徑行勿留直保長安據函嶺東制諸夏是隋亡襟帶我勢萬全中計也若因近趣便先取東都頓兵堅城勝負未決下計也玄感謂經城不拔何以示武今百官家屬皆在洛陽當

先取之以搖其心密計不行玄感至東都所戰必克自謂功在  
旦暮任所獲內史舍人常福嗣故謀不專福嗣恥於被執策議  
皆持兩端密揣其心貳請斬以徇不從私語所親玄感初舉大  
事姦人在側吾屬亡矣未幾福嗣遁去會左武侯大將軍李子  
雄得罪奔玄感勸舉大號以問密密恐見疑不敢直言又不肯  
阿諛順旨入曰公雖屢勝而郡縣未有應者今東都尙彊救兵  
踵來公當率甲身定關中奈何先自尊大玄感笑而止時元弘  
嗣方戍隴右密獻計可陽言弘嗣已反因引軍西玄感從之至  
陝欲圍弘農宮密曰今給衆入關機利在速且追兵踵我若前  
不得據險退無所守何以自完玄感不聽留攻三日不能拔引  
去至閿鄉兵果追及而敗密竄行入關爲邏卒所獲盡索懷金  
亡抵平原賊帥郝孝德不見禮去之淮陽削木皮以食變姓名

教授自給窮困無聊哀吟泣下太守趙佗捕之通免往依妹婿  
雍丘令丘君明轉匿大俠王季才家爲吏迹捕復亡去介其徒  
王伯當以策干東郡賊翟讓曰今主昏於上人怨於下銳兵盡  
之遼海開輔空虛此實劉項挺興之會足下英資豪傑士馬精  
勢指罪誅暴爲天下先楊氏不足亡也讓加禮遣說諸賊至輒  
下之因爲讓計今廩無見糧難以持久卒遇大敵亡且無時不  
如收取滎陽休兵館穀待士逸馬肥乃可與人爭利讓聽之擊  
破金隄關徇下滎陽諸縣河南討捕大使張須陁合兵討讓讓  
素憚須陁欲引去密曰須陁健而無謀且驕勝易驕吾爲公破  
之密率驍勇常何等二十人爲游騎伏丘莽間須陁素輕讓引  
兵直搏伏發與游軍乘之遂殺須陁讓分兵與密別爲牙帳其  
持軍號令甚嚴雖盛夏士皆若負霜雪但得金寶盡散之人樂

爲用復說讓取興洛倉糈粟以賑窮乏讓曰僕起故隴志不及  
此須君得倉更議之密乃以千人出陽城北踰方山自羅口板  
倉據之獲縣長柴孝和開倉賑食老弱襁屬至數十萬越王侗  
遣將劉長恭房胤討密密分軍爲十隊跨洛水抗其東西二軍  
令單雄信徐世勣王伯當列騎爲左右翼自引麾下急擊長恭  
等破之東都震恐衆保太微城臺寺俱滿讓等乃推密爲主建  
號魏公卽位華南設壇場刑牲歃血改元永平赦文稱行軍元  
帥魏公府拜翟讓司徒祁元貞房彥藻左右長史楊德方鄭德  
輔左右司馬雄信世勣左右武侯大將軍祖君彥記室城洛口  
周四十里居之命護軍將軍田茂廣造雲梯三百具益製攻城  
械將軍微進逼東都燒上春門隋虎牢將裴仁基淮陽太守趙  
佗降長白山賊孟讓舉所部歸投仁基上柱國與讓率兵二萬

襲回洛倉入都城掠居人火天津橋爲隋軍所敗仁基等還保  
鞏密自督衆三萬破隋軍於故城復回洛倉左右司馬戰死以  
鄭頊鄭虔象代之諸賊帥黎陽李文相洹水張昇清河趙君德  
平陽郝孝德皆來歸密因襲取黎陽倉永安大族周法明舉江  
黃地齊郡賊徐圓明任城大俠徐師仁又皆來附移檄州縣列  
湯帝十罪天下震動護軍柴孝和說密曰秦地阻山帶河項背  
之而亡漢得之而王今公以仁基壁回洛翟讓保洛口公東鎧  
倍道趨長安百姓誰不郊迎是征而不戰也衆附兵盛然後東  
向指揮豪傑天下廓然無事矣若遲以歲月恐爲人先密曰僕  
懷此久願我部下皆山東人今未下洛安肯便與偕西且諸將  
皆羣盜不相統一敗則掃地矣遂止時隋軍益出密負銳急與  
之礮中流矢臥營中隋軍乘之密衆潰衆倉守洛口會府兵起

太原密自謂主盟遣將軍張仁則致書呼唐王爲兄請以步騎會河內王覽書笑曰密陸梁不可折簡致之且吾方定京師未能東略若不與之是生一敵吾寧推順以驕其志使爲吾守成舉拒東都兵俾不得西我得留撫關中大事濟矣令記室溫大雅作報書厚禮尊讓密大喜示其下曰唐公見推顧天下無可慮者遣其將李士才將兵十二萬攻隋鷹揚將張珣於河陰舉之珣極罵不屈而死齊方士徐鴻客上書勸密乘勝趨江都扶帝以令天下密異其言亟具幣邀之已而去煬帝遣王世充還率十萬討密營於洛西戰不利更陣洛北登山以望洛口是時密兵多騎與長槩而北薄山隘不能騁世充以短兵予看蹙之密軍卻世充乘勝進攻月城密還洛南引而西突世充營世充敗奔還孝和溺死洛水密哭之慟自是大小六十餘戰皆捷讓



部將王儒信憚密威望勸讓自爲大冢宰總衆務以收密權讓  
兄寬亦言天子當自取何乃授人密聞之陰與頤圖讓會世充  
兵又至讓出拒少退密馳助之戰於石子河世充走明日饗士  
名讓至令彥藻引其左右就別帳飲徐出名弓示讓讓挽滿劍  
士蔡建突從後擊殺之并殺其兄姪及儒信乃馳入讓壁慰諭  
士無敢動者以世勣雄信伯當分統其兵因說下滎陽守將楊  
慶世充夜襲倉城又伏甲殪其衆義寧二年世充復營洛北爲  
浮梁絕水以戰密以千騎迎擊不勝世充進薄其壘密提敢死  
士數百邀之世充大潰爭橋溺死者數萬殺大將六人獨世充  
得脫會夜大雪士卒僵死且盡密乘銳拔偃師修金墉城居之  
有衆三十萬與東都留守常津戰上春門執之於陣將作大匠  
宇文愷子儒童河南留守職方郎柳續河陽都尉獨孤武都河

內郡丞柳燮皆降於是。海岱江淮爭聲附實。建德朱粲楊士林孟海公徐圓朗盧祖尚周法明等悉上表勸進。府官屬亦請之。辭以東都未平。且勿議。五月。越王侗稱帝。六月。宇文文化及弑帝。北還擁兵十萬。至黎陽。侗遣使授密太尉。尚書令。東南道大行臺行軍元帥。爵魏國公。令平文化及。而後入輔。密稱臣奉制。引兵東追文化及。使世勣保黎陽倉。密與文化及隔水爲陣。責以負天下大惡。令安往。文化及爲鄙語辱密。密曰。此庸人。吾當折箠笞之。乃以輕騎夾其攻具。度文化及糧盡。僞許通和。文化及喜。旣而密鎖不至。乃寤。驅兵戰童山下。密中矢。頓汲縣。堅壁。文化及勢窮。掠汲郡。趣魏縣。其將陳智略張童仁等率所部兵歸密。前後相踵。文化及先留輜重。東郡令所署刑部尚書王軌守之。至是亦舉郡降。密由是引而西。遣使朝東都。侗召密入朝。行至溫。聞世充殺元

文都乃止復歸金墉拘伺使不遣初密旣殺程讓心稍驕不卹士又素無府庫雖戰勝無所賜與惟厚撫新集人心始離民食洛倉者給授無檢負取不勝至委於路踐蹂狼籍密喜自謂足食司倉賈潤甫諫以倉粟有時而竭粟竭則人散密不聽世勸數規其違內亦不喜使出就屯由是下皆苟且無固志初因少帛世充欲易其粟衆謂不可邴元真貪賄陰勸許焉俄世充士飽降者益少始悔而止武德元年九月世充悉衆決戰先引騎數百渡河密遣驍將十餘迎戰皆被創返明日留伯當守金墉自引精兵出偃師北阻邙山陣以待之仁基謂密曰世充勁兵悉來東都必虛請遷衆向洛必自振歸我乃徐遷以疲之兵法所謂彼歸我出彼出我歸不用仁基擊地歎曰公後必悔世亦陰索貌類密者縛之兩軍旣接埃霧不辨使牽類者過陣謀曰

獲密矣。士皆呼萬歲。密軍亂遂潰。仁基君彥皆爲所禽。偃師人  
却頭叛歸世充。密提衆萬餘馳洛口。將入城。聞元真亦輸款。潛  
導世充軍入洛。密乃遣候騎偵世充期。以半渡掩擊。候騎不時  
覺。比出世充兵已絕河矣。卽引騎遁。武牢衆稍散。將如黎陽。或  
曰。向殺翟讓。猶未平。今可保乎。時伯當已棄金墉屯河陽。密  
輕騎歸之。欲自刎以謝衆。伯當抱密慟哭。衆皆泣。莫能仰視。府  
掾柳奩勸密一意歸關中。密謂伯當將軍族重。豈復與孤俱行。  
哉。伯當曰。昔蕭何舉宗從漢。今不盡行。豈公一失利輕去就哉。  
左右感動。遂來歸。初密建號登壇。疾風鼓其衣。幾仆。卽位時。狐  
鳴於旁。將敗。數有回風。殷發上激砂礫。白日爲晦。屯營鼠皆銜  
尾渡洛。經月不絕。市入關兵尙二萬。高祖遣使迎勞。冠蓋相望。  
密大喜。尙意以台司相處。及至拜光祿卿。封邢國公。殊失望。帝

呼爲弟妻以表妹獨孤氏後禮寢薄執政者又求賄滋不平未幾帝聞密故將多不附世充者乃詔以本兵就黎陽招撫經畧拜伯當左武衛將軍副之馳驛而東至稠桑有詔復召密密大懼謀叛伯當止之不從乃簡驍勇數十服婦人衣藏刀裙下詐爲家婢入挑林傳舍須臾變服出據其城掠畜產趣南山而東經陸渾縣南至熊州爲盛彥師所殺與伯當俱死傳首京師年僅三十七世謂密首勸玄威取關中及自立亦不能鼓而西宜其亡也時世勣尙保黎陽唐遣使持密首招之世勣表請收葬詔歸其尸發喪具威儀三軍縞素以君禮葬黎陽山西南五里墳高七仞密素得士哭多毆血者邴元真之降也世充擢爲行臺僕射鎮滑州故將杜才幹恨其背密僞以兵歸之斬取其首祭密冢已乃歸國單雄信曹州濟陰人與讓友善能馬上用

槍軍中號飛將。假師敗降世充爲大將。秦王國東都。雄信拒戰。槍幾及王世勣。呵之曰。秦王也。遂退。後東都平。斬洛洛上。祖君彥齊僕射。孝徵子。博學彊記。楊師贈連薛道衡嘗爲之隋文。帝不用。煬帝忌知名士。調東都書佐。檢校宿成。令自負其才。常鬱鬱思亂。故爲密草檄。深斥主闕。世充責爲罵國賊。撲之。幾死。臥於樹下。世充中悔。命醫許惠照往視。欲其蘇。息。郎將王振柱蹙其心而死。

王世充字行滿。祖西域人。號支頽。將後徙新豐。死。妻嫁霸城人王粲。父收。目姓王氏。仕隋。歷懷汴二州長史。生世充。豺聲卷髮。忌刻。深阻。稍涉書傳。喜兵法。通龜策。推步以蔭任。左翊衛遷御府直長。兵部員外郎。從楊素北伐。爲幽州長史。大業初。擢民部侍郎。善占對。習法令。敢於舞文。能以口舌緣飾。辨駁所出。衆知。

其非亦不能屈。煬帝南巡爲江都贊治。遷郡丞。善伺主顏色。阿  
意順旨。性機巧。飾臺沼陰奉。遠方珍物以要寵媚。帝甚愛昵之。  
遷通守。兼知官監事。時隋政已亂。而江左浮剽易勛。世充陰結  
豪傑。有繫獄者。必曲法貸。赦以樹私恩。楊玄感反。吳人朱粲。晉  
陵人管崇起兵。應之衆十餘萬。隋將吐萬緒。魚俱羅討之不克。  
世充以偏將募江都萬人。頻擊破之。每捷必歸功於下。掠獲盡  
推士卒。故人爭爲效力。獲功最多。十年齊賊孟讓轉寇諸郡。至  
盱眙。世充拒之。保都梁山。用羸兵示弱。讓果益驕。笑曰。渠文法  
吏。安知兵。吾今生縛之矣。時百姓皆入保。野無所掠。讓衆餒。世  
充列五壁。閉道不得南。久之。知賊已懈。夜夸竈撤幕爲方陣外。  
向旦出奮擊。大破之。斬首萬級。獲十餘萬人。讓以數十騎遁去。  
帝嘉其有畧。復委捕諸盜。所向輒克。會突厥圍帝鴈門。悉發江

都兵赴難詐爲悲泣蓬首垢面日夜不釋甲臥必席棄以要聲  
譽帝以爲忠愈信之厭次賊格謙兵十餘萬屯豆子航爲太僕  
卿楊義臣所殺世充除其餘黨進擊南陽賊盧月明俘繫數萬  
還帝親持酒慰勞因獻江淮良家女以備後庭帝喜李密逼東  
都詔屯洛口大小百餘戰拜右翊衛將軍十四年復引軍與密  
戰洛南有氣若城壓其營世充大敗衆幾盡走保河陽自繫請  
罪越王侗慰安之召還洛哀亡散萬人屯含嘉城畏縮不敢出  
煬帝遇弒侗立拜世充爲吏部尙書封鄭國公侗聽內史令元  
文都盧楚等謀欲先界李密大官使討化及乘其兵疲可以得  
志乃遣使卽軍中封拜位在世充上世充謂其下曰我軍與密  
數戰多殺其父子兄弟一旦爲之下吾屬無類矣侗又欲以文  
都爲御史大夫世充不許曰嘗與公等約左右僕射尙書令御



史大夫留待勳舊。今各欲得之。則流弊競開。何以共守文都。憾焉。潛與楚謀。伏甲殺之。納言良達以告世充。至夜引兵襲含嘉門。圍宮城。右武衛大將軍皇甫無逸等遣將費曜田閤拒戰。不勝。世充收楚殺之。扣紫微宮門。給言文都等欲執陛下。降密伺命。良達執送世充。殺之。因悉遺腹心。代衛士。然後入謝。伺與之盟。進尚書左僕射。總督內外諸軍事。專制朝政。以其兄世惲爲內史。令居禁中。子弟皆將兵。分官吏以主軍政。未幾密破化及還屯金墉。勁兵良馬多死。世充欲擊之。恐士心未一。設鬼謀。以勳衆令德陽門衛張永通言夢中見周公云。以兵助陣。世充白伺立祠洛旁。使巫宣言。周公令急討密。有大功。若遲兵且疫其下。楚人信妖。相率請戰。乃簡卒二萬騎二千。踰洛水爲三橋。以渡密軍。偃師恃新勝。有輕敵心。不設壁壘。世充夜遣三百騎蔽

山而伏遲明薄之密陣未成伏兵上北原乘高馳下壓其營縱焚盧洛密衆大潰進拔假師初密於化及軍中得世充兄世偉及子玄應囚之至是皆歸世充又降其將張童仁陳智畧兵次洛口邴元貞鄭虔象亦以城降悉取美人寶貨而還乃自爲太尉尙書令以尙書省爲府置官屬設三楊於府外求文學堪濟世務武幹絕衆推鋒陷陣及能治冤抑不申者上書陳事日以數百片慰勞省接餽詞誘納欲詭衆取信已而僞妄不能瞞其語衆亦携貳請事伺母劉太后爲假子加號聖感太后散騎常侍崔德本曰此與王莽文母何異耶後食餽前得嘔疾疑見毒遂不復朝以親將張績董濟衛官城武德二年矯伺詔爲相國假黃鉞總百揆封鄭王授九錫冕十有二旒建天子旌旗金根車駕六馬備五時副車旄頭雲罕舞八佾設宮縣出入警蹕衛

士桓法嗣上孔子閉房記書男子持一千驅羊狀因說曰隋楊  
姓也千一爲王此大王代隋之符又陳莊子人間世德充符二  
篇曰與大王名協明當受符命德被人間爲天子也世充大喜  
拜受之擢爲諫議大夫復羅取飛鳥書符命繫鳥頸縱之有捕  
得而獻者亦拜以官諷百官勸進以隋納言蘇威有素望每表  
必署其名又使段達等脅伺天命不常今鄭王功德甚盛請用  
揖讓故事伺怒曰公爲先帝舊臣天下乃高祖天下若隋德未  
寃此言不可發苟天命已改尙何禪爲達等流涕其年四月矯  
伺策禪位幽伺於含涼殿世充偃三讓遣諸將以兵清宮已乃  
戎服法駕鼓吹導入至東上閣更衣冕卽正殿僭位建元開明  
國號鄭封兄世衡秦王世偉楚王世惲齊王諸族屬以次封拜  
立子玄應爲皇太子玄恕爲漢王每朝決政恐門衛有禁無以

盡。趙下情止於順天門外設座。誨喻諄復以示勤篤。百司奏事者聽受爲疲。出入輕騎罷警蹕游歷衢肆行者但止立謂百姓曰。故時天子居九重下情無由察。今非貪位本救時耳。正若一州刺史事皆親覽與士人共議之。每於西朝堂聽覽訴東朝堂。廷諫者章牘填委。觀省不暇。後亦不能復出。五月裴仁基與子行儼及宇文儒童崔德本等謀劫世充復立。伺不克。赤三族六月遂爲殺。伺以絕衆望。率其衆東徇地至滑州。破黎陽。三年肆赦。築練兵臺於伊闕。怒守將羅士信。立盧達。背已歸唐。益務峻誅。凡一人逃家無少長皆坐。父子兄弟夫婦許相告。免令什伍相保。叛者舉伍咸誅。樵牧出入皆爲之限。公私日不聊生。有公事遣外出者自謂仙去。以官城爲大獄。意所猜惡必收繫其人。家屬命將悉質其孥。質多食寡。悉皆餓死。唐太祖詔秦王率兵

來攻至新安屯堡多下始敗之於慈潤城八月王陳兵青城宮  
世充悉兵以拒隔澗言曰隋失其國天下分崩長安洛陽各有  
分地吾常自守不敢西顧熊穀二州在度內不取敦隣好也不  
料遠涉吾地越三嶠饋糧千里勤師遠出將欲何求王曰四海  
之人皆承唐正朔獨公迷不復東都士民來請師陛下重建我  
是以來公若降富貴可保必拒我勉之無多言世充約割地不  
許九月王若廓進拔輟懷徇地至管城河南州縣以次降始寶  
建德與世充隙至是遣使結好世充遣兄子琬內史令長孫安  
世報聘且乞師爲援四年二月青城宮守將以宮降世充引兵  
出方諸門臨穀水以戰王陣北邛令屈突通引步士五千踰水  
奮擊兵接王引騎殊死鬪自辰及午世充兵潰王傳城塹而守  
之城中原盡至以水汨泥去礫取浮土糴米屑爲餅民病腫股

弱相籍倚道上尙書郎盧君業郭子尙等皆餓死御史大夫鄭  
頴巧爲浮屠惡其言殺之自此氣竭但嬰城須建德救五月王  
擒建德并獲琬與安世俘於城下遣安世入宮敗狀世充惶惑  
欲突圍出保襄漢謀於諸將皆不答遂率將吏詣軍門降王受  
之以屬吏陳兵入城發府庫資將士其黃門侍郎薛德音以移  
檄娖道崔弘丹造弩多傷士先誅之收段達楊汪孟孝義楊公  
卿郭仕衡郭什柱董濟張童仁王德仁等斬洛洛上械世充歸  
長安唐太祖數其罪赦爲庶人與其族皆徙於蜀將行羽林將  
軍獨孤修德殺之初修德父機嘗仕越王侗爲世充所屠者也  
世偉及玄應在道謀反伏誅世充篡凡三年

竇建德貝州漳南人世爲農材力絕人重然諾喜俠節鄉人喪  
親貧無以葬建德方耕遽解耕牛給之盜夜劫其家擊三人死

餘不敢進。請其尸。曰：可投繩取之。盜投繩。建德乃自縊。使曳出。踞起。批刀復殺數人。由是知名。爲里長。犯法赦歸。遭父喪。送葬。殆千人。所贈賻皆不受。募補征遼隊長。邑有孫安祖。盜牟爲縣令。笞辱刺殺。令亡。抵建德。相與陰謀。曰：往文皇帝天下盛彊。百萬伐遼。猶爲所敗。今剝瀆未平。山東盜起。水潦爲災。民力凋敝。主上不恤。又重發兵。丈夫當建功於世。渠爲亡命。鹵乎。聞高難泊。廣袤數百里。葭藁阻奧。可以違難。承間椎標。足以自資。因聚豪傑。觀時之變。以就大計。安祖然之。益招亡兵及民無產者數百人。高難爲盜。安祖號模牟。公時卻人張金稱結衆萬餘。依河渚間。募人高士達兵千餘屯清河。自稱東海公。羣盜往來漳南。獨不入建德。問郡縣疑之。捕族其家。建德聞家已屠滅。卽率麾下亡歸士達。士達以爲司兵。已復殺安祖。自領所部衆滿至萬。

能傾身接下與士卒均甘苦以是能致人死力大業十二年  
郡通守郭絢帥兵討士達自以智畧不建推建德爲軍司馬以  
兵屬之建德旣統衆思用奇謀厭伏羣盜乃請士達守輜重自  
引精兵七千迎絢詐遺書約降請前驅執賊自效絢信之引兵  
至長河界解不設備反襲其軍殺數千人獲馬千匹絢以數十  
騎亡追及斬於平原獻首士達威振山東隋遣太僕卿楊義臣  
破張金稱殘黨畏誅復歸建德義臣欲乘勝入洺窮剋根穴建  
德度隋善將獨有義臣勸士達引兵避其鋒彼欲戰不得軍老  
食乏乘之可有功士達不納留建德守壁身自將兵逆戰置酒  
享士建德歎曰東海公未捷遽自矜大禍不旋踵矣隋兵勝必  
長驅而來吾不能獨支乃留衆保壁帥銳士據險以待後五日  
士達果敗追北薄壁守兵潰建德不能軍以百餘騎走饒陽乘



其無備取之義臣已殺士達謂餘黨不足憂引去建德復還平原爲士達發喪軍皆縞素收葬其齒招潰卒得數千人軍復振自稱將軍得隋官及士人恩遇甚備尋故饒陽長宋正本爲賓客參次軍議隋郡縣吏聞者多以地歸勢益張大兵至十餘萬上谷賊王須拔號漫天王畧幽州戰死其將魏刀兒號歷山飛墜深澤衆十餘萬以計襲取之并有其地十三年正月築壇場於河間樂壽自立爲長樂王署官屬分治郡縣七月隋右翊衛將軍薛世雄督兵三萬討之屯河間七里井建德以勁兵伏旁澤中僞遁世雄以爲畏已稍弛備因率敢死士千人襲之會大霧晦冥隋軍驚潰相騰藉死者如丘世雄引數百騎亡去盡得其衆獲河間丞王琮勞遣之琮復嬰城攻之未下俄而食盡又聞煬帝遇弒琮率吏發喪乘城大臨建德爲退舍琮乃率郡屬

而縛詣軍門降。建德親釋徽，繼與言隋亡。琮伏哭盡哀，授以漢州刺史。或言其久拒敵，多殺士，今力窮而下，請烹之。答曰：「往日爲盜，可妄殺人。今將安百姓，定天下，而可害忠臣誼士乎？」吾方旌擢以勵事君者，卽傳令有背琮者，罪三族。始都樂壽號金城，官備百官，準開皇故事。冬至大會，有五大鳥集其宮，羣鳥從之。改元五鳳。又宗城人獻玄圭，景城丞孔德紹獻爲天所授，禹者建國稱夏，拜德都內史侍郎。武德元年，追字文化及至魏縣，連戰破之，縱撞車機石四面攻拔。聊城入見，蕭皇后稱臣伏謁，召文武官執宇文智及楊士覽、元武達、許弘仁、孟景等共臨斬之。梟首轅門，囚化及并其子，載以檻車至大陸縣，斬之。生平性約素，不喜食肉，飯脫粟茹蔬。妻曹氏，未嘗衣綺綺，及爲王妾侍，裁十數。每下城破敵，賞寶並資將士。至是得降官人千數，悉放去。

捷聞越王侗封爲大夏國王拜隋黃門侍郎裴矩右僕射兵部  
侍郎崔君肅侍中少府令何稠工部尙書餘隨才署職委以政  
事其文武曉果萬餘各聽所之有願往關中及東都者給道里  
費護出於境二年陷邢趙滄三州復陷冀州執刺史趙稜救復  
其任八月陷洛州獲刺史袁子幹遂遷都更號萬春宮使人如  
瀧津祀漢景太后及安成侯充墓置守冢三十家立以爲祖又  
遣使朝侗與王世充結歡俄世充廢侗乃絕之始建天子旌旗  
出入警蹕書稱詔追諡隋帝爲閔北聘突厥迎齊王暕子政道  
爲郕公并獻化及首末殘連突厥侵相州刺史呂珉死之進攻  
衛州執河北大使淮安王神通同安長公主饋以客禮釋黎陽  
守將李世勣復使守之滑州刺史王軌奴殺主來奔命斬奴返  
軌首溺入德之遂降隨下齊濟二州寇賊徐圓朗亦降俄世勣

自拔歸國吏請誅其父釋不問高祖遣使修好卽以所迎還義  
成公主等歸京師隋親將趙州刺史張志昂邢州刺史陳君賓  
大使張道源等被執將殺之祭酒凌敬切諫以爲人各爲主悟  
而釋之後以讒殺大將王伏寶臨刑呼曰伏寶無罪矧功在諸  
帥上王何自刈左右手乎九月自帥師圍幽州爲羅藝所敗藝  
乘勝襲其營建德填塹而出復敗藝衆進薄其城不能拔乃還  
又擊濟陰賊孟海公會秦王伐東都舍人劉斌獻說曰今唐彊  
鄭弱勢必舉鄭鄭滅則大夏有齒寒之憂爲大王計莫若援鄭  
使抗其內我攻其外唐兵必卻唐卻而鄭完然後徐觀其變未  
爲遲也建德曰善乃遣使與世充連和并陳赴援之意復令其  
臣李大師魏處捨來朝請解其圍秦王留之不答四年克周橋  
擒孟海公留將范頤戍之悉發海公四弟之衆號三十萬以救

世充至滑州行臺僕射韓弘開城延納進逼元梁管三州皆陷  
管州刺史郭志安死之遂屯滎陽連舟泝河西相屬不絕壁成  
臯東原築營板渚遣使與世充約期又遣秦王書三月秦王據  
虎牢以騎五百覘其營設伏道側獨以數騎去營三里誘賊追  
至伏所卒起奮擊追斬三百級獲其將殷秋石瓚乃報書建德  
時旣失二將又見唐兵稍得書猶豫六十日不敢西王遣王  
君廓以輕騎抄饒道執大將張清特建德懼其諸將新破海公  
掠獲盈溢日夜思歸凌敬說以悉兵濟河取懷州河陽以重將  
戍之然後鳴鼓建旂踰太行入上黨傳檄旁郡進壺口以駭蒲  
津收河東地此上策也且有三利一乘虛搆境師有萬全二拓  
土得衆三鄭圓自解建德將從之而王琬長孫安世泣涕日請  
兵西益齎金玉以啗諸將其妻勸從禁酒計拒不聽曰鄭朝暮

待吾來吾既許之豈可見難而退示天下以不信五月自板渚  
出爲陣西薄汜水南屬鵠山亘二十里鼓而前世充弟徐州行  
臺世辨遣將郭士衡帥數千人以爲游兵秦王怱虎牢城望其  
軍按甲不戰待其饑困破之建德被重創竄牛口谷車騎將軍  
白士讓楊武威獲之傳而西斬長安市年四十九初其軍諸曰  
豆入牛口勢不得久至是果應其妻與左僕射齊善行以騎數  
百遁還洛州餘黨欲立其養子爲主善行以謂天命有歸不如  
委心識命無爲塗炭生民也遂分府庫散給將士令各解去善  
行與裴矩并行臺曹旦率官屬及妻奉山東地并傳國八璽來  
降自起兵至滅凡六年

劉黑闥建德同縣人少相友爲人嗜酒無賴喜捕博不治產父  
兄厭苦之建德每資以財輒盡亦弗之計隋末亡命從郝孝德

爲盜素彊武多狙詐李密拔爲裨將從王世充補馬軍總管時  
李世勣陷於建德使攻新鄉世勣鹵黑闥獻之建德封漢東郡  
公常令陰入敵中覘虛實每出不意奮奇兵多所摧克軍中號  
爲神勇及建德敗還匿漳南杜門不出唐祖已誅單雄信楊公  
卿又召故將范願董康買曹湛高雅賢將用之願等疑畏乃謀  
爲建德復讐相與詣卜者云劉氏當王因共往見故將劉雅不  
從殺之咸言黑闥果敢多奇畧寬仁容衆恩結士卒欲集大事  
非其人莫可卽奔漳南黑闥聞衆言喜與共椎牛饗士得兵百  
餘襲破縣治貝州刺史戴元祥魏州刺史權威合兵討擊皆敗  
死收其器械衆始千人建德故時左右稍稍歸之兵浸盛乃設  
壇塲祭建德告以舉兵意自稱大將軍攻陷歷亭殺守將王行  
敏饒陽賊崔元遜殺涇州刺史裴晞應之徐圓朗亦與連和遂

取瀛州攻定州移檄趙魏招來將吏杞州人周文舉殺刺史王  
孝矩來附北連高開道勢張甚進至宗城衆數萬世勛時爲黎  
州總管戰敗走洺州追及之步卒五千皆覆僅以身免又攻陷  
冀州總管麴稜死之陷邢州僞授王琮中書令劉斌中書侍郎  
遣使北結突厥頡利遣侯斤宋邪那率騎來從軍勢大振陷魏  
州總管潘道毅死之不半年盡有建德故地朝議遣秦齊二王  
討之五年陷相州殺刺史房見建號漢東王改元天造以願爲  
左僕射康買兵部尙書高雅賢王小學左右領軍復用建德僚  
屬部於洺州其行政規模皆師建德而攻戰勇決過之秦王自  
請統兵來討師次衛州黑闥數挑戰輒爲王所敗始懼委相州  
退保列人營王下相州又隸州人殺刺史以叛王破列人洺水  
縣人請爲內應王使總管羅士信入城守之黑闥復攻陷洺水



殺士信王阻水爲連營。分奇兵絕其饋路。堅壁不動。度糧盡。乃預堰洺水上流。使淺須賊渡。亟決之。黑闥果率騎二萬絕水陣。與王師決戰。水暴至。衆不得還。斬首萬餘級。溺死數千。乃與願等共奔突厥王。還復藉突厥兵攻定州。時曹該康買亦逃鮮虞。聚兵應之。唐高祖以淮陽王道玄原國公史萬寶往討。敗績。由是河北復叛。歸於黑闥。仍都洺州。閻滄與恒刺史王公政死之。畧瀛州。詔齊王往擊。不敢進。皇太子自請督兵并力。頻戰敗之。於館陶引軍走躡。北至毛州。州人董燈明殺刺史趙元愷以應。黑闥乃復整衆背水濟渠而陣。太子縱騎搏之。赴水死者數千。黑闥遁去。騎將劉弘基追蹙賊。不得休馳。至饒陽。騎能屬者百餘。困且餒。黑闥所署總管崔元遜迎拜。固請延入饋之以食。方飯。騎將諸葛德威勒兵前。黑闥罵曰。狗輩負我。遂執詣皇太子。

所斬之德威舉郡降山東始定餘黨及突厥兵間道亡定州總  
管雙士洛邀戰平之初秦王建天策府其弧矢倍於常制逐黑  
圓時爲突厥所窘因以大箭自射卻之突厥得箭傳觀以爲神  
後餘大弓一長矢五藏之武庫以爲世寶每郊丘重禮必陳於  
儀物之首以識武功

薛舉河東汾陰人父汪徙居蘭州金城舉容貌魁岸武敢善射  
殖產鉅萬好結納邊豪爲長雄隋末任金城府校尉會歲凶隴  
西盜起金城令郝瑗募兵討賊舉爲將始授甲集吏人大會  
置酒舉與子仁果及其黨劫瑗於坐矯稱捕反者卽起兵囚郡  
縣官發粟以賑貧乏自號西秦霸王建元泰興以仁果爲齊公  
少子仁越晉公賊宗羅睺率兵來會以爲義興公招附餘盜剽  
馬牧兵其鋒銳甚所徇皆下隋將皇甫綰兵萬人屯枹罕舉以

精兵二千襲之遇於赤岸陳兵未戰大風忽起綰陣氣色昏暈部伍錯亂舉介騎乘之大潰遂陷枹罕岷山羌鍾利俗以衆二萬降兵大振進仁杲齊王東道行軍元帥羅喉爲義興王副之仁越晉王河州刺史因徇下鄯廓二州不閱旬盡有隴西地衆至十三萬大業十三年七月僭帝號於蘭州立妻鞠氏爲后仁杲爲太子卽其先墓置陵邑立廟城南陳兵數萬展墓訖大饗使仁杲圍秦州仁越趨劔口掠河池太守蕭瑀拒卻之遣將常仲興渡河擊李軌與軌將李贇戰昌松仲興軍敗而沒仁杲克秦州舉往都之進逼扶風汧源賊唐弼立李弘芝爲天子有衆十萬拒仁杲不得進舉遣使招之弼乃殺弘芝以降仁杲聞弼無備復襲取之盡奪其衆弼走軍勢益張號三十萬將窺京師會唐太祖入關留秦王攻扶風擊破之斬首數千級逐北至隴

坻而還舉畏王追走踰隴問其下曰古有降天子不僞黃門侍郎褚亮勸以轉禍爲福古嘗有之昔趙佗以南粵歸漢蜀劉禪亦仕晉近世蕭瑄其家尙存郝瑗時爲衛尉卿進曰皇帝失問亮亦失言昔漢祖兵屢敗蜀先主嘗亡其妻子古今各有勝負豈因一不勝便爲亡國計乎舉亦悔其言乃曰聊試公等卽厚賜瑗以爲謀主瑗請連梁師都厚賂突厥合縱東向舉從之突厥莫賀咄設將入犯爲唐使者宇文歆說止舉謀遂阻武德元年豐州總管張長慈擊羅喉舉悉兵援之屯析撫以游軍掠岐關秦王禦之次高撫城度舉糧少利速鬪堅壁老其兵會王臥病不出舉數挑戰行軍長史劉文静殷開山恃衆不設備舉兵掩其後遂大敗死者十六大將慕容羅喉李安遠劉弘基皆沒王還京師舉拔高撫性殘虐獲降兵酷刑殺之仁果進逼寧州

瑗欲乘勝直趨長安臨發舉適病亡言唐兵爲祟未幾果死仁  
果代立僞諡舉武皇帝

仁果多力善騎射軍中號萬人敵性尤賊悍每獲俘必斷舌刈  
鼻或舂斫之流畧民人妻妾嘗得史信子立怒其不降磔之火  
剖以啖士拔秦州取富人倒縣以酢注鼻或枕其隱以求財雖  
舉殘猛亦惡之戒曰汝材畧足辦事而傷於虐終覆吾宗其妻  
亦凶暴喜觀楚人見不勝痛死轉於地命理其足惟露腹背受  
捶由是人心不服會諸將與仁果素有隙咸稍懼瑗以哭舉病  
不能起兵勢稍衰秦王復屯高壩堅壁以待挑戰不得其將牟  
君才內史令翟長慈以衆降左僕射鍾俱仇以河州降王策其  
糧盡衆離必可破滅表裏奮擊宗羅睺敗率騎追奔至夜悉軍  
馳所居析撫城進明合圍攻之仁果率僞官屬出降王受之俘

歸京師及舊黨數十伏誅。別將旁企地羗彙也奔入南山由商洛出漢川衆尙數千所過剽害敗大將麗玉至始州掠王氏女醉寢於野女取所佩刀斬之送首梁州詔封王氏崇義夫人舉未葬而滅父子盜隴右凡五年。

弘簡錄卷七十

終

弘簡錄卷七十一

明刑部員外郎仁和邵經邦弘齋學

皇清翰林院侍講學士四世孫遠平校閱

附載

李軌

安典貴脩仁附

劉武周

宋金附附

苑君璋

高開道

徐圓朗

蕭銑

杜伏威

關發王雄誕附

輔公祐

沈法興

李子通

左才相附

朱粲

林士弘

張善安

梁師都

劉季真

郭子和

羅藝

李軌字處則涼州姑臧人畧知書有智辯財雄邊郡好罵人急  
鄉黨稱之大業中補鷹揚府司兵薛舉亂度必來侵然吏皆屏  
怯無足與計乃召同郡曹珍關謹梁碩李贊安脩仁等計欲相

戮力據河右以觀變。衆允其謀。相與舉兵。然莫適敢主。珍曰。我聞識書李氏當王。今軌賢非天啓乎。率衆羅拜。聽命。脩仁等欲盡殺隋官。分其財產。軌曰。諸公幸見推。當稟吾約。今軍以義興。意在救亂。若殺人取財。是乃賊耳。何以求濟。衆應曰。諾。會突厥達度闕說可汗內屬。降於軌。軌遣脩仁等夜率諸寇入內苑城。建旗大呼。執虎賁郎將謝統師。郡丞韋士政。遂自稱河西大涼王。舉果發兵來侵。遣贊敗之。斬首二千級。悉擄其衆。軌縱還之。贊謂力戰而始俘。又縱以資敵。不如盡阬之。軌不聽曰。若天命歸我。當禽其主。此皆我有。否者徒留何益。竟遣之。未幾拔張掖。燉煌。攻陷河州。西平。枹罕。悉有河西。僭號稱帝。建元安樂。立子伯玉爲皇太子。署官屬。以長史珍爲左僕射。頤爲吏部。脩仁戶部。皆尚書。統師太僕。卿士。政太府。卿。餘拜官。有差。會唐高祖方



圖薛舉以璽書慰結自稱從弟軌喜遣弟懋入朝拜爲大將軍  
詔鴻臚少卿張俟德持節冊軌爲涼王涼州總管給羽葆鼓吹  
一部俟德至軌名其下議一姓不兩立欲去帝號京向受冊珍  
曰已爲天子奈何受人官必欲以小事大請行請警故事稱梁  
帝而臣於周軌從之乃遣僞尚書左丞鄧曉來朝奉書稱從弟  
大涼皇帝帝怒曰軌稱朕爲兄此不臣也因曉不遣軌初以碩  
爲謀主衆憚其有篡畧嘗見故西域之種族盛勸軌備之因與  
脩仁等交怨軌子仲琰候碩恨不得起相與譖碩軌不察錫之  
由是故人疑懼頗不爲用有妖巫妄言上帝將遣玉女召兵築  
臺以候多所糜損值荐饑人相食珍議發倉粟統師等內不附  
思結羣黨離其衆心以珍議非國計閉粟不發下益怨多欲叛  
去會脩仁兄典貴在長安自表詣涼州招軌帝許之典貴至軌

授以左衛大將軍因間訪自安策典貴勸以舉河西地奉國東歸雖漢寶融未足吾比軌默不荅典貴知軌不可說乃與脩仁等潛引西域兵圍其城又薛舉柱國奚道宜率羗兵奔軌許以刺史不與道宜怨與共來擊軌以步騎千餘出戰敗而入城引兵登陴以須外援典貴傳言唐使我來取軌不從者罪三族於是諸城皆不敢動軌乃攜妻子上玉女臺屬酒爲別脩仁執送赴京斬於長安白起至亡凡三年詔拜典貴右武侯大將軍封涼國公賜帛萬段脩仁左武侯大將軍中國公並賜實封六百戶鄧曉在唐廢不齒

劉武周瀛州景城人父匡徙馬邑母趙氏嘗夜坐庭中見物若雄雞流光燭地飛投入懷感而娠生武周爲人驍悍善騎射喜交豪傑維于州里兄山伯嘗嘗辱之曰汝不擇所與必滅吾宗

武周因去至洛爲太僕楊義臣帳下征遼有功補建節校尉還  
隸馬邑虜揚府太守王仁恭頗愛遇之令總處候直閤下久之  
盜仁恭侍兒懼覺被誅稱疾臥家豪傑往候多椎牛縱酒語曰  
今盜賊方起衆復大飢而官粟徒紅腐誰能與我共取之諸惡  
少皆願從遂與其徒張萬歲等十餘人候仁恭視事武周上謁  
萬歲自後入斬仁恭持首出徇郡中無敢動者遂開倉賑窮乏  
馳檄屬城皆下得兵萬餘自稱太守遣使附突厥隋雁門丞陳  
孝意虎賁郎將王智辯合兵來討圍桑乾鎮會突厥大至與武  
周共擊破智辯隋師敗績孝意奔還雁門爲人所殺以城降武  
周以馬兵咸益振乃攻陷定襄復歸馬邑突厥立武周爲定楊可  
汗遣以狼頭纛僭稱皇帝妻沮氏爲后建元天興以衛士楊伏

念爲左僕射苑君璋爲內史令初上谷賊宋金剛有衆萬餘與魏刀兒連和因救刀兒爲竇建德所敗餘衆四千保西山建德招之不從至是率衆來歸武周得之甚喜封爲宋王委以軍務中分家產遺之金剛亦自結出其妻而聘武周妹說同取晉陽南向以爭天下更授金剛西南道大行臺武德二年令率兵二萬入侵并州次黃蛇鎮連衝突厥破榆次敗齊王拔介州進圍太原詔遣太常少卿李仲文禦之爲金剛所執舉軍皆沒仲文逃還又破平遙畧涪州詔裴寂爲晉州道行軍總管拒戰敗績齊王委并州遁武周入據之遣金剛攻陷晉州執劉弘基進破滄州呂崇茂自號魏王以應賊隋河東守將王行本亦與之合關中震動高祖詔秦王督兵進討屯于栢壁永安王孝基與于筠獨孤懷恩唐儉等攻夏縣不克軍城南崇茂與武周將尉遲

敬德襲破孝基軍四將被執敬德還渝州王遜戰破之於美良川敬德與別帥尋相援王行本於蒲武周攻仲文於涪州不勝遣將黃子英護餽道爲驃騎將軍張德政襲斬之降其衆金剛圍絳州糧乏卒飢引去王追至雀鼠谷日中八戰皆捷斬殺數萬獲輜重千乘遂走介州官軍迫之以餘衆二萬出西門背城而陣旣戰小卻王以精騎突擊破之金剛將輕騎去敬德遂降相與萬歲等救其精兵復介州武周引騎棄并州北走突厥金剛收散卒將還懼衆不爲用亦以百騎奔突厥并州平河東地盡復未幾金剛背突厥欲還上谷爲其追騎斬之武周亦謀歸馬邑計露突厥殺之自起兵六年而滅

苑君璋馬邑豪也以趙雄自奮妻劉武周妹當武周引衆南向君璋說曰唐舉一州定三輔所向風靡此殆天命不可以人謀

爭今太原而南地多險阻。若懸軍深入。後無所繼。萬一有失。勢不可償。不如連和突厥。結援朝廷。南面稱孤。此上策也。武周不聽。遣守朔州。未幾果敗。泣曰。不聽君言。乃至於此。卽與共趙突厥。武周旣死。突厥立君瑋爲大行臺統舊部曲。令郁射設監兵。助之君瑋進寇代州。刺史王孝德拒戰却之。故將高滿政勸曰。突厥無親。不可久居。請盡殺其衆以歸唐。君瑋不從。乃自率馬邑來降。詔拜滿政朔州總管。封榮國公。明年君瑋與突厥復攻馬邑。殺滿政。罄其黨而去。退保恒安。部下多中國人。往往叛去。君瑋勢窮。乃請降。高祖許之。遣鴈門人元普賜以鐵券。會頡利亦名之意猶豫。子孝政諫曰。大人許唐降。又從頡利。是自取亡也。今糧盡衆攜。若不卽決。恐衿肘變生。不忍見禍之臨也。卽單騎南奔。君瑋喻返之。召衆與議。恒安人郭子威說曰。恒安故王。

者和山川足以自固突厥方疆我藉其援可觀天下變何遠降也君璋然之執元普送突厥頡利德之遺以錦裘羊馬已而見頡利政亂必亡率所部來降拜安州都督封芮國公賜食邑五百戶帛四千匹爲人不通書史然天資習事歷職有惠稱貞觀中卒

高開道滄州陽信人世業鹽少趨勇走及奔馬隋末依河間賊格謙未甚奇之會謙爲隋兵圍捕左右奔散無救者開道獨身決戰殺數十人捕兵解謙得免由是知名引爲將軍謙滅與其黨亡匿海曲復出剽滄州衆稍附得數百人北掠戍堡自臨渝至懷遠皆破之遂引兵圍北平未下隋守將李景自度不能支拔城去入據其地武德元年陷漁陽有鎧馬數千衆萬人自號燕王先是懷戎浮屠高曇晟與其徒襲殺縣令僞號大乘皇帝

立尼靜宣爲耶輸皇后建元法輪遣使約開道爲兄弟封齊王  
引衆從之居三月復殺曇晟并其衆仍稱燕王建元署置百官  
竇建德圍羅藝於幽州藝請救開道二千騎赴之建德解去乃  
因藝使請降高祖以爲蔚州總管上柱國爵北平郡王賜國姓  
五年幽州饑開道許輸藝粟所遣老弱就食皆厚遇之藝悅不  
以爲虞更發兵三千車數百馬驢千往請開道悉留不遣遂北  
連突厥告絕於藝復稱燕國與黑闥聯兵入寇攻易州刺史蔣  
容孝幹死之遣將謝稜詭降於藝請兵應接藝衆至稜縱擊破  
之因導突厥俱南恒定幽易等處騷然懼患頡利將攻馬邑資  
其攻具與俱拔之時天下大定欲入降自疑反覆得罪所恃突  
厥自安然將士多山東人思歸人心頗離開道有親兵數百皆  
勇敢士號爲義子恐諸將亡匿常令在閭內護衛而黑闥亡將



張君立因敗亡歸與開道愛將張金樹每督義子及是將爲變  
潛令左右數人僞爲義子入閤陰絕弓弦取刀聚牀下旣瞑而  
出與其徒攻之諸義子將搏戰亡弓刀張君立舉火外應閤下  
大擾開道顧不免擐甲挺刃與妻妾據堂上金樹畏不敢前天  
且明先縊其妻妾及諸子而後自殺金樹羅兵取義子皆斬之  
亦殺君立遂歸國自開道起兵凡八年滅以其地爲媯州拜金  
樹北燕州都督

徐圓朗兖州人隋末據本部爲盜以兵徇瑯琊以西北至東平  
盡有之附于李密密敗歸竇建德僞授兖州總管封魯郡公黑  
闥兵起朝命盛彥師安輯河南抵任城圓朗執之以應自號魯  
王黑闥僞授大行臺元帥統兖鄆陳杞伊洛曹戴八州諸郡響  
應濟州別駕劉伯通執刺史竇務本譚州刺史李義滿殺齊州

都督王薄皆叛附之秦王破黑闥遣兵屯濟陰經畧之汴州總  
管王要漢又敗圓朗兵執周文舉圓朗懼河間人劉復禮說曰  
彭城有劉世微才畧不常相貌異士夫許其必王若迎立之  
功無不濟圓朗謂然彥師以世微若聯叛禍且不解謬以翟讓  
川李密爲說圓朗又信之迎世微至奪其兵以爲司馬遣徇地  
所至皆下忌而殺之會淮安王神通與李世勣合兵攻圓朗兵  
數敗總管任瓌遂圍兗州百姓爭踰城山降圓朗窮迫棄城與  
麾下數騎夜亡爲野人所殺

蕭銑後梁宣帝會孫祖巖開皇初叛隋降陳陳亡文帝誅之銑  
少貧傭書自給事母盡孝煬帝時以外戚授羅川令時隋政不  
綱大業十三年岳州校尉董景珍雷世猛軍帥鄭文秀許玄微  
萬瑱徐德基郭華何人張緒等共謀反推景珍爲主自顧衆

心不厭銑故梁裔寬仁大度有武皇遺風可推以應天順人卽遣人往告銑報書曰先君昔事隋戰貢無廢貪我土宇滅我宗祔我是以痛心疾首思刷厥耻今天誘乃衷公等降心將復梁緒微福于先帝吾敢不糾厲士衆以從卽募兵數千揚言跡盜將以應景珍會頽川賊沈柳生寇羅川諸將出戰不利銑語其衆曰吾先人昔都此地造名柳生亦當從我衆皆大悅乃以是年十月自稱梁公旗幟服色悉用其舊柳生以衆歸銑僞授車騎大將軍不五日遠近爭附衆至數萬趨于巴陵景珍遣德基與華率羈姓數百迎謁先見柳生柳生退與其下謀曰梁公起我最先附勲當第一今岳陽兵衆而位多誰肯爲我下不如殺德基質其人獨挾梁公以進因殺德基詣中軍白銑銑驚曰今欲撥亂遂自相屠我不能爲若王矣步出軍門柳生懼伏地請

罪銑責省之陳兵而進景珍慮柳生凶賊共處必將爲亂遂謀斬之乃築壇城南柴告上帝改號梁王有異鳥適至建元鳳鳴義寧二年僭稱皇帝署百官用梁故事追諡從父琮爲孝靖帝祖殷河間忠烈王父璿文憲王封景珍晉王世猛蔡王文秀楚王玄微燕王瓚魯王緒齊王楊道生宋王隋將張鎮川王仁壽擊銑不能克隋亡鎮周與竇長真等率嶺南州縣盡降於銑時林士弘據九江鄱陽銑遣將孫吾兒拔諫章道生取南郡緒畧定嶺表西至三峽南盡交趾北距漢水皆附屬焉勝兵四十萬武德元年徙都江陵脩園廟引岑文本爲中書侍郎掌機密遣道生攻峽州刺史許紹擊破之士死過半三年高祖詔夔州總管趙郡王孝恭討之拔通開二州斬僞東平王蕭闍提銑見諸將擅兵橫恣恐寢不制乃陽議休兵營田以黜其權大司馬景

珍爲將軍怨之謀作亂事洩被誅景珍方鎮長沙下書赦其  
罪名還江陵景珍懼遣使詣孝恭降銑遣張銑來攻景珍潰而  
走麾下殺之續進尚書令亦恃功驕蹇銑又誅之素性外寬內  
忌疾勝已者於是大臣舊將皆疑間多叛去銑不能禁自此愈  
弱四年詔孝恭與李靖率巴蜀兵順流而下廬江王瑗由襄陽  
道黔州刺史田世康出辰州道會兵圖銑僞將周法明以四州  
降卽授黃州總管趙夏口道攻安州克之僞將雷長頴以魯山  
降銑遣其將文士弘來拒戰清江口李恭大破之獲鬪艦千艘  
校武昌宮陽枝江松滋僞江州將蓋彥舉以城降李恭靖直逼  
其都值銑散兵江嶺祇留宿衛數千倉卒追集道路回遠未及  
赴孝恭布長圍守之數日破其水城取樓舡數千交州總管丘  
和長史高士廉司馬杜之松詣靖降銑度救不至語其下曰天

不祚梁若待勢窮事迫必害百姓諸人何患無君麾衆使下守  
陴者皆慟以太平告于廟率官屬總袞布幘詣軍門降謝曰當  
死者銑爾百姓無罪請無殺掠孝恭受之獲送京師後數日救  
兵十餘萬至知銑降皆送款銑至高祖讓之語不屈怒斬都市  
年三十九自僭國至滅凡五年

杜伏威齊州章丘人少豪蕩不治生與里人輔公祐約劉頊交  
以盜羊畏縣迹捕相與亡命爲盜年始十六素狡譎多鋒銳行  
剽劫衆用其策皆效嘗營護諸盜出爲引入爲殿其黨愛服共  
推爲主大業九年入長白山依左君行不得意舍去轉劉淮南  
稱將軍下邳賊苗海潮擁衆鈔暴伏威脇諭之曰天下共苦隋  
豪傑興義然力窮勢分不相統一若合以爲彊則無事矣公能  
爲主吾且樂從不然一戰以決海潮懼卽以其衆下之江都留

守道校尉宋顥將兵捕擊伏威與戰。僞北誘墮葭榛澤中。順風縱火迫之。燒死幾盡。海陵賊趙破陣聞其兵少。輕之。召使并力。伏威乃引親將操牛酒往謁。而使公祐嚴兵待變。破陣悉召諸酋置酒高會。方引入幕。伏威遽突斬破陣。衆貽駭。不及救。復殺數十人。下皆畏服。公祐兵亦至。遂并其衆。至數萬。攻安宜。屠之。隋遣虎牙郎將來整。致討。戰于黃花輪。伏威大敗。身被重創。與公祐皆亡。去收餘卒八千。與虎牙郎將公孫上哲復戰。鹽城覆其軍。煬帝遣右禦衛將軍陳稜討之。久不敢出。遣以巾幘始帥兵至。伏威迎擊。稜軍射中其額。怒曰。不殺汝。矢不拔。大呼入陣。四面衝擊。衆披靡。獲所射將使拔已箭。斬之。攜其首復入。稜軍示之。又殺數十人。遂大潰。稜走而免。進破高郵。引兵渡淮。攻歷陽。據之。自稱總管。分兵徇屬縣。皆下。江淮羣盜爭附。伏威選敢

死士五千號上募厚待之與均甘苦每攻取必先登聞鼓在背者殺之所掠獲悉以分給有戰死以其妻殉故人自奮宇文化及授以歷陽太守不納徙丹陽自稱大行臺始進用士人繕利兵械薄賦歛除殉葬法民姦若盜及吏受賕皆殺無赦上表越王侗以爲東南道大總管封楚王時秦王方討世充遣使招懷伏威乃獻款高祖授東南道行臺尚書令江淮安撫大使上柱國封吳王賜姓李豫屬籍其子德俊爵山陽公仍給帛五千段馬三百匹伏威遣其將陳正通徐紹宗以兵會取世充之梁郡又遣王雄誕討李子通於杭州會以獻破汪華於歙州盡有江東淮南地南屬嶺東至于海及平劉黑闥秦王師次曹窋伏威懼請入朝拜太子太保兼行臺尚書令留京師位在齊王上以能之晚喜神仙餌雲母被毒武德七年二月暴卒後公祐反



伏威令以給衆高祖詔追削官爵屬籍沒入家產太宗知其  
寃貞觀元年復官爵以公禮葬仍還其子封有養子三十人皆  
壯士惟閔稜王雄誕知名 閔稜同邑人貌冠雄營用兩刃刀  
長丈餘名曰拍刀一揮殺數人前無堅敵戰江淮間以功顯署  
左將軍部兵皆羣盜橫相侵牟稜案罪殺之雖紀故不私以後  
令行禁止從入朝拜左領軍將軍越州都督討輔公祏賊于青  
山陣左接脫兇鏖示衆曰不識我耶尚敢與戰其徒多營部氣  
遂索至有拜者然頗自伐公祏被禽誣稜預反謀其貲產在丹  
陽孝恭悉籍沒之怒稜自訴遂誅稜 王雄誕曹州人少彊果  
有力絕人初起用兵戰多克署驃騎將軍李子冠初與伏威合  
後憚其才襲之伏威被創墮馬雄誕負逃澤中裒散亡來整  
敗時別將西門君儀妻王氏勇決而力負伏威走雄誕總麾下

壯士以從追兵至還拒被數創氣彌厲由是得脫軍中以年之  
多寡號稜大將軍雄誕小將軍公祐敗李子通乘勝追之反爲  
所擠士皆走壁雄誕獨提私卒數百銜枚夜往乘風火之遂大  
敗歙守汪華在郡稱王且十年還師攻之華率勁甲出新安洞  
拒戰雄誕伏兵山谷以弱卒悞之會暮還伏兵已據洞口不得  
歸遽而縛降間人遂安據崑山無所屬伏威使計之雄誕謂邑  
險而完攻之靡日遂卑騎造壘門陳國威靈開曉禍福遂安卽  
降論前後功授歙州總管封宜春郡公伏威入朝留公祐居守  
以兵屬雄誕副之陰誡以無容公祐爲變公祐乃縱反間陽言  
得伏威教責其貳已雄誕素質直亟歸臥病公祐奪其兵遣君  
儀往諭雄誕謝曰雖死詎不相從公祐益之生平愛人善撫士  
能攻下死力每破城邑整衆山立無絲毫犯死之日江南士庶

爲之流涕。高祖嘉其節，以子世果襲爵。太宗贈左驍衛大將軍。越州都督諡曰忠世果。垂拱初，至廣州都督安西大都護。

輔公祏齊州臨濟人，伏威號總管，僞授公祏長史，使將精卒渡江，擊李子通衆十倍其鋒銳。甚公祏命選甲士千人，操長刀居前，別以千人隨之而已。以其衆殿，令曰：「卻者斬！」俄而子通方陣以進，長刀千人皆死。闕公祏從後縱左右翼搏之。子通大潰，降其衆數千。武德二年，詔授淮南道行臺左僕射，封舒國公。伏威與公祏少相愛，又兄事之。故軍中呼爲輔伯。尊禮畧等，後伏威稍忌之，乃署養子稜左將軍，雄誕右將軍，推公祏爲僕射。陰解其柄，自是怏怏不平。與故人左游仙僞學辟穀，以自晦。旣而游仙說公祏反，詐言伏威不得還，貽書令公祏起兵。因僭卽僞位，國稱宋都陳，故宮署百官，僞授游仙兵部尚書、東南道大使。越

州總管增修器械轉漕糧遣將徐紹宗侵海州陳正通寇壽陽  
唐遣李孝恭趨九江取蕪湖下梁山三鎮李靖下宣城黃君漢  
出譙郡李世勣由淮泗四面討之任瑰拔楊子城降僞將龍龜  
遂據揚州公昶復遣將馮惠亮陳當世屯博望山正通紹宗屯  
青林山拒戰孝恭率諸將破之惠亮正通走靖追躡百餘里衆  
悉潰餘騎奔丹陽公昶懼棄城奔會稽就左游仙兵數萬夜至  
毗陵從者裁五百僞將吳驤孫安謀執之復棄妻子與腹心數  
十斬關遁抵武康爲野人所執送丹陽孝恭斬之傳首京師自  
與伏威起距公昶死凡十三年

沈法興湖州武康人陳廣州刺史恪子隋末爲吳興郡守東陽  
賊樓世幹畧其郡煬帝詔與太僕丞元祐討之及聞帝被弑自  
以世居南土宗族數千遠近嚮服乃與昶將孫士漢陳果仁執

祐號令遠近以誅宇文化及爲名義寧二年三月發東陽行收  
兵將趨江都先下餘杭比至烏程衆至六萬毗陵通守路道穆  
拒之約與連和因襲殺之入據其城遣果仁攻丹陽破賊帥樂  
伯通江表十餘州相繼定自署江南道總管聞越王侗立上書  
稱大司馬錄尚書事天門公承制置百官僞授果仁司徒士漢  
司空蔣元超左僕射殷莘徐令言左右丞劉子翼選部侍郎李  
百藥爲掾及侗被廢武德二年僭稱梁王建元延康易隋官儀  
用陳氏故事自詭南方諸城可跋而平專立威刑將士細過輒  
肆誅戮無矜恤心由是上下攜解時諸雄竊據者衆毘陵要衝  
三面受敵軍數挫衄俄遣子綸救江都陳稜反爲李子通所敗  
乘勝渡江破京口使將蔣元超拒之於處亭大敗死之法興懼  
棄城與左右數百投間人遂安遂安遣將葉孝辯迎之已而法

典中悔將殺孝辯趨會稽爲所覺自沉於江凡三年滅

李子通沂州丞人少貧以餓獵爲生家無儲蓄而好周人急見  
斑白負戴者必代之隋末倭長白山賊左才相以武力爲所親  
任鄉人有陷者經護之時羣盜多暴忍獨推子通仁愛歸者日  
多不半歲有徒萬人才相畏忌之乃自引衆渡淮與杜伏威合  
爲隋將來整所破奔于海陵衆復歸之自稱將軍大業十一年  
僭號楚王率兵攻江都總管陳稜稜窮乞師於沈法興杜伏威  
伏威自將屯清流子通納言毛文深用間募吳人詐爲法興兵  
夜襲伏威二人交惡子通得悉力取江都入而據之盡俘其衆  
因僭卽帝位國號吳建元明政齊賊樂百通先守丹陽卽以萬  
衆來歸僞授左僕射又敗法興兵取晉陵降李百藥以爲內史  
侍郎典文檄殷芊爲太常卿司禮樂江南士人多歸之已而輔

公石攻拔丹陽進屯溧水子通戰敗糧且盡復橐江都保京口  
伏威盡得其地俄東走太湖裒散兵二萬襲破吳郡入琅餘杭  
率官屬都焉東舉會稽南距嶺西抵宣城北太湖悉有之武德  
四年伏威遣王雄誕來侵戰于蘇州子通敗退保餘杭雄誕進  
傅城復遣將陳當率兵千人出其不意乘高蔽岨多張疑幟縛  
炬徧山澤子通窮感請降伏威受之并樂伯通送京師高祖薄  
其罪賜宅一區田五頃資予頗厚及伏威來朝子通語伯通曰  
東南未靖我故兵多在江外若收之可建大功相與偕亡及藍  
田爲關吏所獲並伏誅

朱粲亳州城父人初爲縣吏大業中從軍伐長白山賊亡命爲  
盜號可達寒賊不務稼穡專以劫掠爲資自稱迦樓羅王衆至  
十萬度淮屠竟陵沔陽轉剽山南所至殘戮無遺然類毀城隳

整諸盜中尤其忍虐僭號楚帝建元昌達攻拔南陽義寧朶山  
南撫慰使馬元規討之軍大敗收餘衆復振至二十萬陷鄧州  
刺史呂子臧死之時荒亂相襲富者稍有窖藏皆爲發食遷徙  
無常去輒燔屠百姓大饑路死者枕藉軍亦匱竭至掠婦人小  
兒烹食之初引隋著作佐郎陸從典通事舍人顏愍楚爲賓客  
後兩家盡爲所食俄而諸賊懼皆逃散鄭元璠與戰商州敗之  
顯州首領楊士林田瓚合兵旁郡響應相聚攻之大戰淮源黎  
敗挈殘衆奔菊潭遣使乞降高祖以前御史大夫段確假散騎  
常侍往勞之確醉戲黎曰君膾人多矣若爲味黎曰膾炙肥人  
珍味莫有加者若噉嗜酒人正似糟豚確慙罵曰任賊黎卽收  
確于坐并從者數十悉襲之以饗左右遂屠菊潭奔王世充署  
龍驤大將軍東都平斬洛水上恨之者競擲瓦礫擊其尸須臾



若家

林士弘饒州鄱陽人隋季與鄉人操師乞起爲盜師乞自號元  
興王建元天成據豫章以士弘爲大將軍隋遣治書侍御史劉  
子翊討賊射殺師乞士弘收其衆復戰彭蠡湖子翊敗死兵遂  
大振衆十餘萬據虔州自號南越王俄僭號稱楚帝建元太平  
任其黨王戎爲司空侍御史鄭大節以九江郡下之臨川廬陵  
南康宜春皆殺守令以附北盡九江南番禺悉有之後甯銑以  
舟師破豫章士弘獨有南昌虔湖之地銑敗其亡卒稍歸之  
復振孝恭招降循潮二州武德五年士弘弟鄱陽王藥師以兵  
二萬圍循州總管楊世畧被斬之士弘請降王戎亦獻南昌地  
詔爲總管士弘復遁保安城山誘潰亡謀復亂袁州人相聚應  
之士弘死其黨乃散

張善安兖州方輿人年十七亡命爲盜轉掠淮南會孟讓敗得其散卒八百襲破廬江郡依林士弘不見信憾之反襲士弘焚其郛去保南康蕭銑取豫章遣將蘇吾兒守之善安奪掠其城俄舉以降授洪州總管與輔公柝同反僞授西南道大行臺掠孫州執總管王戎又襲殺黃州總管周法明會李大亮兵至爲開曉禍福答曰反非已意爲部下誑誤今降易耳但懼不免奈何大亮曰總管若降吾固不疑囚獨入其陣相與握手交談示無猜意善安大喜將數十騎詣大亮營方引入命壯士執之騎驚走悉兵來戰大亮諭以善安自歸何庸鬪爲其黨罵曰總管賣我遂潰送于京師高祖赦之後得與公柝交通書乃伏誅梁師都朔方人族姓強衆郡推豪右仕隋爲鷹揚府郎將大業末罷歸結徒爲盜殺郡丞唐宗據郡反自稱大丞相聯兵突厥

敗隋將張世隆因畧定雕陰弘化延安自爲梁國僭皇帝位祭  
天於城南坎地瘞玉得印以爲瑞建元永隆始畢可汗遣以狼  
頭纛號大度毗伽可汗解事天子導以兵居河南地拔鹽川郡  
武德二年寇靈州長史楊則擊走之又與突厥千騎營野豬嶺  
延州總管段德操勒兵不戰以挫其鋒伺其氣懈遣副總管梁  
禮進擊德操自以輕騎從旁乘之遂大潰遂北二百里俘馘甚  
衆後數月又以步騎五千來寇德操盡屠之降其堡將張舉劉  
曼師都懼遣尚書陸季覽說處羅可汗引兵而南已爲鄉道已  
而處羅死兵不出六年其將賀遂索周以所部十二州降德操  
悉兵攻之拔東城師都保西城不敢出復求救突厥頡利以萬  
騎赴之師都先因信讒殺降者稽胡帥劉金成其下多疑懼叛  
去師都日益威親往朝頡利誘使南畧自此盜邊無寧歲入窺

渭橋後突厥政亂師都勢危太宗諭使歸不從詔夏州長史劉  
旻司馬劉蘭經畧之所獲生口縱以爲歸君臣離撓頻出輕騎  
蹂其禾稼城中饑虛天狗星忽墮其城其健將辛獫兒李正寶  
馮端謀執降不果正寶挺身來歸貞觀二年旻與蘭表上可取  
之狀詔柴紹薛萬均并力致討旻以勁卒直據朔方東城以逼  
之頽利來援會大雪羊馬多死紹遂戰破之進屯城下其從父  
弟洛仁斬師都降詔以其地爲夏州擢洛仁右驍衛將軍朔方  
郡公自起至滅凡十二年

劉季真離石邊人父龍兒大業十年舉兵自稱王以季真爲太  
子第六兒爲永安王鋒甚銳將軍潘長文連年擊不能下後虎  
賁郎將梁德襲破龍兒殺之衆乃散唐兵起六兒復爲盜附劉  
武周季真從之自號太子王六兒爲拓定王迭爲邊害武德二

年陷石州刺史王儉死之詔西河公張綸眞鄉公李仲文合兵討之季眞懼而來降詔以爲石州總管賜姓李氏封彭城郡王季眞見宋金剛戰滄州勝負未決復連武周及敗蔡王執六兒斬之季眞奔高滿政俄被殺

郭子和同州蒲城人仕隋爲左翊衛以罪徙榆林大業末郡饑與死士十八人執郡丞王才數以不卹下斬之遂開倉賑窮乏自號永樂王建元正平號其父爲太公以弟子政爲尚書令子端子升爲左右僕射存其二千南連梁師都北事突厥納弟子升爲質始畢可汗冊爲平楊天子不敢當乃更署爲屋利設武德元年獻款授靈州總管金河郡公徙鄜國公襲梁師都寧朔城克之每伺突厥虛實陰以章聞爲邏騎所獲處羅可汗怒囚子升子和危畏舉部南徙詔於延州故城居之五年從平劉

黑闥有功賜以國姓拜右武衛將軍貞觀元年賜實封二百戶  
十一年除婺州刺史徙婺國公顯慶初轉黔州都督乞骸許之  
進金紫光祿大夫卒

羅藝字子延襄陽人後家京兆父榮隋監門將軍藝性桀黠剛  
愎不仁勇攻戰善用槊大業中以力戰補虎賁郎將遼東之役  
以兵從武衛大將軍李景督饒北平分部嚴整然任氣嘗慢侮  
景頗爲所辱時天下盜起涿郡號富饒加以伐遼兵仗倉庫盈  
羨臨朔宮復多珍寶雖屯師數萬遇盜來侵留守趙什住賀蘭  
誼晉文衍等輒不能支藝勇冠諸將數破強寇人多畏忌之乃  
陰自詭以激衆怒曰吾軍討賊數有功而食乏今官粟若山而  
留守不行賑卹豈安人強衆意哉聞者皆怨旣而旋師郡丞郊  
謁藝執之陳兵而入什住等懼皆聽命藝卽發庫貲賜戰士倉

粟給窮民境內大悅殺異已者太守唐祥以下數人威動北邊  
柳城懷遠並歸附黜太守楊林甫改柳城郡曰營州以襄平太  
守鄧曷爲大總管藝自稱幽州總管字文化及遣使招降藝自  
謂隋舊臣義不貽辱斬使者爲湯帝發喪時建德開道亦遣使  
來招復以爲劇賊不足共功名欲決意歸唐會張道源撫輯山  
東亦諭藝降武德三年乃奉表以其地歸詔封燕王賜以國姓  
豫屬籍數與建德戰多所禽馘秦王擊劉黑闥遣其弟監門將  
軍壽以兵從而自率衆數萬破賊弟劉什善於徐河突厥入寇  
復以兵與皇太子會洺州遂請入朝帝厚禮之拜左翊衛大將  
軍自負其功遇秦王左右至者常斥辱之帝怒以屬吏久乃釋  
時突厥橫肆藉藝威名憚敵詔以本官領天節軍將鎮涇州太  
宗卽位進開府儀同三司藝內不自安乃圖謀反詭言閱武兵

既集稱被密詔入朝軍至涇州治中趙慈皓出謁遂入據之帝命長孫無忌尉遲敬德擊之未至慈皓與統軍楊岌潛謀誅藝藝覺執慈皓囚之時岌在城外急攻之藝敗棄妻子從數百騎奔突厥抵寧州騎稍亡左右斬之傳首京師梟于都市壽時爲利州都督亦誅

冊曰妖、彗、肆、眚、倏、忽、亘、天、滅、不、淹、晷、禍、不、踵、旋、圖、王、僭、帝、凶、德、相、繼、所、益、幾、何、爲、類、爲、勛、



弘簡錄卷七十二

附載

吳楊行密

子渥隆演溥

南唐李昇

子景孫煜

前蜀王建

子衍宗壽附

後蜀孟知祥

子仁質等併附董璋

伊審微

韓保正

王昭遠

趙廷隱

高彥休

楊行密字化源廬州合肥人少孤及長豪雋有勇能手舉百斤

與里人山頽陶雅劉威相善唐末起從江淮為羣盜刺史鄭聚

捕獲奇其狀貌陰縱之後應募為州兵能日行三百里州遣通

于蜀如約而還戍朔方遷隊長歲滿軍吏忌者使復戍別所將

行過吏舍陽為好言問行何所欲行密奮曰欲公頭耳即斬而

出因起兵爲亂自號八營都知兵馬使刺史郎幼復棄城走遂入據廬州高駢表爲刺史乃以顏爲八營都將陶雅左衛山將討定山盜駢將呂用之恐其不可制遣俞公楚以兵五千屯合肥名爲討巢而陰圖之行密擊殺公楚秦宗權遣弟宗衡渡淮取舒城又破走之駢署行密行軍司馬使拒畢師鐸行至天長聞駢被囚而秦彥已入揚州遂屯于蜀岡師鐸率衆出擊行密陽敗棄營走師鐸兵爭入營取貲乃反兵奮擊師鐸大敗單騎走還行密攻其西門彥及師鐸奔于東塘行密遂入揚州城中倉廩空竭饑民相食度不能守欲奔蔡州彥等復合宗衡攻之行密乃閉城不出已而孫儒殺宗衡攻破高郵行密益懼其客袁襲勸殺海陵鎮遏使高霸以并其衆得兵數千朱全忠自領淮南表行密節度副使以司馬李璠知留後行密大怒不納更

以知觀察留後時孫儒勢盛赫然有吞吳越之意行客欲遁保  
海陵襲曰海陵難守廬州吾舊治也城廩完實可爲後圖久之  
襲又勸取宣城趙錚引兵戰于曷山大敗之錚棄城走行客遂  
入宣州昭宗授檢校司徒宣歙觀察使乃籍銳士數千皆蒙皂  
衣甲號黑雲都使李簡將之又併盱眙山谿二屯籍爲左右黃  
頭軍以李神福爲黃頭都尉分遣攻浙西取蘇常潤三州二年  
取滁和州景福元年取楚州凡七年定其八儒驅衆渡江來攻  
行客以持重困之當其饑疫擊敗擒之拔舒州以神福爲刺史  
乾寧二年復入揚州加檢校太傅同平章事淮南節度使封弘  
農郡王以田頔守宣州安仁義守潤州昇州刺史馮弘鐸來附  
分遣頔等襲濠州執刺史張璠以劉金守之進取壽州敗汴將  
劉知俊復攻蘇州擒刺史成及以朱黨守之朱延壽拔斬光二

州以爲團練使霍丘路當南北走集以已豪朱景爲鎮將初行  
密兵皆江淮人輕弱適兗州朱瑾爲梁所敗來奔太原將李承  
嗣史儼史建章皆降得其勁騎兵勢益振四年梁遣葛從周龐  
師古攻壽州命瑾迎擊遂殺師古追從周至泃河又敗之五年  
錢鏐及周本戰于白方湖本敗蘇州復入于越天復元年遣神  
福攻越戰臨安擒鏐將顧全武以歸二年弘鐸復叛襲宣州田  
頔敗之神福代刺昇州昭宗在岐遣江淮宣諭李儼拜爲東面  
諸道行營都統檢校太師中書令封吳王得承制封拜詔與河  
東等八道同攻朱全忠乃以瑾領平盧軍由海州取青齊弘鐸  
領感化軍出漣水攻徐宿延壽領奉國軍圍蔡州神福爲鄆岳  
招討攻武昌杜洪以率全忠兵青州王師範被梁兵求救遣王  
茂章赴之大敗梁兵殺朱友寧全忠大怒自將來擊復敗之以

後再將兵行至宿州輒還先是頽與仁義延壽同起微服佐行  
密破孫儒及江淮甫定行密思漸休息以三人皆猛悍難制頗  
欲除之會錢鏐叛將徐綰許再思召頽攻鏐垂克而行密納鏐  
賂命頽解兵頽歸而謀反行密別遣臺蒙爲宣州觀察使驛頽  
頽敗死仁義乃沙陀叛將以善射自負軍中素推米志誠善射  
朱瑾善槊仁義大言曰志誠小不當朱瑾槊一瑾槊十不當  
仁義小一及聞頽死亦反焚東塘以襲常州刺史李遇追至夾  
岡仁義復入潤州行密遣王茂章李德誠等圍之茂章穴地道  
入取仁義斬之卽以領潤州團練使延壽者夫人朱氏之弟屍  
後必反乃陽爲目疾給夫人曰吾兒子皆不足任事思得延壽  
付之夫人喜急召延壽至則迎于寢門刺殺之併燔朱夫人惟  
神福不變頽常執其妻子招之謝曰吾以一卒從吳王起事今

爲大將忍背德而顧妻子耶。立斬其使。軍士聞之皆感奮遂敗。顧將王壇兵于吉陽磯時杜洪危甚。天祐二年遣劉存執斬之以存爲刺史。襄州趙匡凝聞之來降行密。雖起盜賊以僭竊得志然寬仁雅信能得士心。其將蔡儔叛悉毀行密墳墓及儔收諸將請報。獎曰吾以此歸惡何忍復爲。嘗使從者張洪負劍而侍。洪乘間擊行密不中死。後復用所善陳紹負劍不疑。顧攻下歙州刺史裴樞有美政民愛之以禮送還朝。蘇州刺史成及被執聞及素廉介。問其室惟圖書藥劑將辟爲行軍司馬及遽引刀自刎乃厚禮歸之。嘗罵其將劉信信醉奔孫儒戒左右勿追曰醒必復來。明日果至揚州。承孫儒亂能約已省費不三年富雄數倍。嘗過楚州臺諫盛供帳以待及去遺衣臥內皆經補完。諫大慚見茂章營第。獎曰天下未定志乃在此。尚肯爲我忘身。

平方帝東遷。恥憤被病。及聞被弑。發喪不視事。因是病篤。薨年五十四。諡曰武忠長子渥立。溥僭號。後追尊爲太祖。武皇帝陵曰興陵。渥字承天。幼弱不任事。而大將劉威有威望。嘗命代主軍政。行密病。出渥爲宣州觀察使。徐溫私謂渥曰。今王有疾。而出冢嫡。此必有姦臣之謀。若他日有名非溫使。慎無應命。渥泣謝而去。尋病甚。命判官周隱作符名渥。隱持兩端。未發。溫與嚴可求入問疾。聞之大驚。遽詣隱所。急取符名渥。渥見溫使者。卽行。遂代立。名隱殺之以王茂章。代爲宣州觀察使。茂章尋得罪。奔錢塘。梁代唐。敗元渥。仍稱天祐三年。鍾傳卒。子匡時代立。渥以秦裴爲江西制置使。與劉存率兵往攻。執之以歸。馬殷復取岳州。獲存。并刺史陳知新。殷索聞其名。欲活之。存等大罵不屈而死。四年。渥以溫專權。引宣州帳下兵三千入衛。命腹心陳

璠范遇將之溫與左衛都指揮張顥惡侵其權擁牙兵就廳事  
拽璠等下斬之渥不能止由是失政五年五月溫行弒遣紀祥  
等入寢中縊殺渥時年二十三諡曰景後追尊烈宗景皇帝諡  
曰紹陵 仲弟隆演字鴻源初名瀛又名渭溫顥始謀弒渥約  
分其地以臣於梁弒後顥欲背約自立溫患之謀於嚴可求答  
曰顥雖剛愎而闇於成事此非易爲明日顥列戟府中召諸將  
議事自大將朱瑾而下皆去衛從然後入顥三問誰所當立皆  
莫敢對可求密啓顥曰方今四境多虞非公主之不可然恐爲  
之太速外有劉威陶雅李簡李勣皆先王時人也未知此輩能  
降心否不若輔立幼主漸以歲時待其歸心然後爲可顥不能  
對可求因趨出爲渥母史氏教言楊氏創業艱難而嗣王不幸  
隆演以次當立告諸將以無負楊氏而善事之辭旨激切聞者



感動顯氣色皆沮。卒無能爲。隆演乃得立顯。由此與溫有隙。諷隆演出溫潤州。可求復以計留行軍副使李承嗣與顯謀遣客刺可求。不能中。明日可求詣溫謀就衙堂執殺顯。自此政事一出于溫。隆演備位而已。六月撫州危。全諷袁州彭彥章吉州彭玕信州危。仔倡皆起兵叛。時大將周本攻蘇州敗歸。怒不肯出。因可求薦彊起之。本曰前敗非怯也。乃上將權輕而下多專命。爾若必見任。願無用。副從之。戰于象牙潭。執全諷彥章玕遂奔楚。仔倡奔越。八年徐溫領昇州刺史治舟師於金陵。宣州李遇自以勳位高。憤溫用事。嘗輕之曰。徐溫何人。溫聞之怒。以王墮代遇。遣柴再用以兵送之。遇不受命。再用使客何楚說遇。使自歸。遇出再用乃殺之。并族其家。九年溫率將吏進隆演位太師。中書令溫爲行軍司馬。梁道王茂章攻壽春敗之于霍丘。陳章

攻楚取岳州執其刺史苑玫十二年溫鎮潤州以子知訓爲行  
軍副使秉政惟大事遙決于溫知訓驕侮諸將欺隆演幼弱尤  
凌忽之嘗使酒謾罵隆演愧恥涕泣而走左右扶侍者悉殺之  
吳人仄目冬潛楊林江水中出火燄可以燃十三年宿衛將李  
球馬謙謀亂以誅知訓爲名挾隆演登樓取庫兵陣于門橋知  
訓與戰頻却副都統朱瑾麾外兵進遂斬球謙餘兵皆潰十五  
年四月瑾殺知訓攜其首入府中亦自殺米志誠聞有變被甲  
率其家兵至天興門聞瑾已死乃還疑志誠助瑾與可求謀  
殺之恐事不克使人偽從湖南境上來告軍捷名諸將入賀因  
擒斬之六年春三月溫率將吏請隆演卽天子位不許嚴可求  
見溫謀曰唐亡於今十二年吳兵猶不敢改天祚可謂不負唐  
矣然吳所以征伐四方而建基業者常以興復爲辭今聞河上

之職。梁兵屢紬。若李氏復興。其能屈節乎。宜於此時先建國以自立。溫深然之。夏四月。溫奉玉冊。寶綬。尊隆旗。卽吳王位。建宗廟社稷。置百官。如天子之制。改天祐十六年爲武義元年。大赦境內。追尊行密孝武王。廟號太祖。渥景王。廟號烈祖。拜溫大丞相。都督中外諸軍事。封東海郡王。知誥左僕射。參知政事。可求門下侍郎。駱知祥中書侍郎。殷文圭沈顏翰林學士。盧擇吏部尚書。李宗陳璋左右雄武統軍。柴再用錢鏐左右龍武統軍。王令謀內樞使。江西劉信征南大將軍。鄂州李簡鎮西大將軍。撫州李德誠平南大將軍。廬州張崇安西大將軍。海州王綰鎮東大將軍。文武以次進位。封宗室皆郡公。時隆演年少。體在徐氏。建國稱制。皆非本意。常怏怏。酣飲稀復。進食。搆疾以卒。年二十四。後追尊爲高祖。宣皇帝陵曰肅陵。傳行四。初封丹陽郡公。

兄廬江郡公濠當立以徐氏秉政不欲長君乃立溥改元順義  
七月改昇州大都督府爲金陵府拜溫爲尹冬十一月祀天於  
南郊御天興樓赦境內拜溫太師可求右僕射三年唐莊宗滅  
梁遣司農卿盧蘋使于唐可求密條數事授之至洛陽莊宗果  
問次第以對四年溥大閱舟師徐溫迎見於白沙改名迎鑾鎮  
六年追爵溫四代祖考立廟於金陵進徐知詢輔國大將軍金  
陵尹治溫舊鎮諸子皆封王加可求同平章事是歲莊宗崩輟  
朝七日七年溫率文武上表勸進十一月庚戌御文明殿卽皇  
帝位改元乾貞建都金陵大赦境內上追尊廟號二年正月封  
東海爲廣德王江瀆廣源王淮瀆長源王馬當上水府寧江王  
采石中水府定江王金山下水府鎮江王六月荆南高季興來  
附封爲秦王九月季興敗楚師於白田獲其將吏三十四人來

獻三年十一月溥加尊號睿聖女則孝皇帝大赦境內改元太和二年而其子江都王璉爲太子三年王令謀宋齊丘並同平章事六年閏正月拜令謀司徒齊丘司空七年九月溥加尊號光孝應天弘道廣德八字大赦改元天祚後禪位徐知誥溥遷潤州丹陽宮卒年三十八諡曰睿凡二世四主垂五十年璉妻徐知誥女後爲康化軍節度使以疾卒子孫皆遷海陵號永寧宮嚴兵守之絕不通人久而男女自爲匹偶吳人多哀憐之顯德三年世充征淮南下詔撫安楊氏子孫李昇聞之遣人盡殺其族周先鋒都部署劉重進得其玉硯瑪瑙枕翡翠瓶以獻楊氏遂絕

間曰五代迭興年僅五十楊氏一姓適符其曆海之盜者暴梁僭逆

徐溫字敦美海州朐山人少販鹽爲盜與行密同起號三十六英雄獨溫未嘗有戰功後用其客嚴可求謀殺朱延壽以功遷右衛指揮使始預謀議凡隨行密破敵諸將爭取金帛溫獨餘困作粥以食餓者行密病時舊將皆戰守在外溫居帳下遂預立溫之功旣而以弑溫之罪歸張顥因盡殺紀祥等以其事入白渥母史氏泣曰吾兒年幼禍亂若此得保百口以歸合肥公之惠也時行密舊將皆在白族李遇人人自危溫僞爲恭謹務行詐以得吳人之心諸將乃安歷鎮海軍節度使同平章事封齊國公兼兩浙招討使以昇潤宣常池黃六州爲齊國建大都督府鎮金陵卒年六十七追封齊王諡忠武李昇僭位號爲義祖生平猜恤多疑而善用將吏常遣李壽攻越戰于臨安被執裨將曹筠奔越溫聞遣人謝筠汝軍有求吾不能給是吾過

也今欲用汝爲將汝妻子吾厚遇之秋越人攻毗陵溫戰于無錫筠感前言臨陣奔歸遂敗越兵又遣王祺會洪真信三州兵攻虔州久不克以劉信代之將使人說降譚全播來告溫怒曰信以十倍之衆攻一城不下而反用說客何以威敵答其使者遣之因命濟師遂破全播人有誣信逗留將反者信聞之因自獻捷與之宴歡好竟日然終疑之及唐師伐王衍急召信至廣陵以爲左統軍託以內備遂奪其地所任惟駱知祥長于理財嚴可求善於籌畫故嘗以軍旅問可求國用問知祥

李昇字正倫徐州人世本微賤父榮遭唐末亂不知所終昇少孤流寓濠泗間行密攻濠州得之奇其狀貌養以爲子諸子頗不能容乃以昇溫自姓徐氏名知誥及壯身長七尺廣額隆準溫厚有謀事溫甚孝謹過于諸子知訓嘗召與飲伏劒士欲害

之行酒吏刁彥能以爪指之悟而走免爲吳樓船軍使屯金陵以殺李遇功拜昇州刺史時江淮初定多用武夫爲州縣吏專務強兵重斂獨知誥好學接禮儒者立身自勵躬行節儉以寬仁爲政民愛譽之溫將建國聞其有善政往視果見府庫充實城壁修整乃徙於之而轉知誥刺潤州旣而徐知訓爲朱瑾所殺以潤州近廣陵得先聞卽日以州兵渡江定亂遂殺唐宜諱使李儼自代知訓秉政以彥能爲撫州節度使務改知訓行事欲收人心乃寬刑法推恩信起延賓亭以待四方之士引宋齊丘駱知祥王令謀等爲謀客凡士有羈旅者齒用之民間有婚喪匱乏往往賙給盛暑未嘗張蓋操扇天寒出衣食以濟貧民以故吳人歸心行軍司馬徐玠數勸溫以已子代其秉政溫遣知詢入朝廣陵玠反爲知誥謀誣知詢謀反留不遣斬其客將



周延望以知諤代爲金陵尹知詢爲右統軍知誥歷平章事太尉中書令以可求亦嘗勸溫謂二郎非徐氏子恐爲後患至是出之楚州溫死知誥出鎮金陵如溫之制進封東海郡王對鏡見鬚白頽吏周宗嘆曰吾老矣功業未就奈何宗知其意馳詣廣陵見宋齊丘謀禪代齊丘以爲未可請斬宗以謝不聽出爲池州刺史吳江王濛怨已不得立心嘗不平乃廢爲歷陽公使覲信王宏以兵守之濛奔廬州節度使周本欲納其子祚止之縛送金陵見殺大和七年進位太師天下兵馬大元帥改封齊王已而閩越諸國皆遣使勸進自謂人望已歸天祚三年建齊國置宗廟社稷以宋齊丘徐玠爲左右丞相十月溥遣攝太尉楊璘傳位國號齊改年昇元以金陵爲西都廣陵爲東都冊尊溥爲高尚思元弘古讓皇帝尊溫爲忠武皇帝封徐氏子知誥

江王知謬饒王女郡縣公主周本以不能事二姓歸而法莫遂  
貞婉以死二年四月百官請復姓李氏改名曰昇自言唐愍宗  
子建王恪生超超生志爲徐州判司已乃四世孫改國號曰唐  
追尊恪孝靜皇帝廟號定宗超孝平皇帝廟號成宗志孝安皇  
帝廟號惠宗榮孝德皇帝廟號慶宗以門下侍郎張居誅中書  
侍郎李建勳右僕射張延翰同平章事十一月講武於銅橋步  
騎八萬三年四月郊祀圓丘羣臣請上尊號不許州縣言民孝  
悌五代同居者七家尤盛者江州陳氏皆旌表門閭復其徭役  
四年六月晉安州節度使李金全來送款遣鄂州屯營使李承  
裕迎之與晉將馬全節安審暉戰敗及裨將段處恭皆死都監  
杜光鄴被執遣還與吳越錢氏約和通好不絕六年吳越大火  
遣使弔問厚賜其乏時昇志在守吳舊地無復經營之略客馮

延巳常謂之其實吳人賴以休息七年卒年五十六諡曰光文  
肅武孝高皇帝廟號烈祖陵曰永陵長子景立 景初名景通  
後改璟避周諱復爲景初蔭爲駕部郎中轉諸衛將軍昇專政  
付以國事拜兵部尚書參知政事山鎮金陵遷司徒平章事知  
內外左右諸軍事將篡位召赴金陵爲中外諸軍副都統受禪  
封吳王加諸道元帥錄尚書事改王齊襲位改元保大郊祀天  
地尊母宋氏爲皇太后立鍾秦章女鍾氏爲皇后用宋齊丘周  
宗爲左右宰相常夢錫直宣政殿專掌密命馮延巳翰林學士  
馮謐中書舍人陳覺樞密使魏岑查文徽副使皆以邪佞用事  
吳人目爲五鬼昇篡楊氏齊丘與宗最爲有功效事成齊丘陽入  
九華山昇屢招之未幾以病出爲洪州節度使景復召之陳覺  
魏岑皆所引用二人有私隙譖覺於景左遷少府監齊丘亦罷

爲浙西節度使復歸九華山賜號九華先生封青陽公食一縣  
二年遣查文徽及待詔臧循發兵攻建州降王元政馮延巳爲  
相未幾諸將爭功福州李仁達清源留從効送欵吳越軍皆潰  
歸景大怒復召齊丘爲太傅罷延巳爲少傅岑爲太子洗馬時  
契丹陷中原遣使來聘以兵部尚書賈渾報之河中李守貞反  
景遣朱元往救無及而還邊錡平湖湘尋復失之三年周世宗  
征淮南破景衆於正陽進圍壽州趙匡胤總禁兵又破景將何  
延錫於渦口擒皇甫暉於滁州景大懼遣其臣鍾謨李德明奉  
表願爲附庸又遣孫晟王崇質獻濠壽泗楚光海六州以求罷  
兵四年周師大破景軍於紫金山降其將朱元克壽州冬又克  
濠泗二州景改元交泰是春周師克楚州連克揚州將巖濟江  
景大懼請盡割江北之地畫江爲界稱臣奉貢世宗許之始稟

周之正朔上表稱唐國主答書用唐報回鵠可汗之制皇帝恭  
問江南國主始臨汴水置懷信驛以侍周使先時中原多故跨  
據江淮三十餘州擅魚鹽之利卽山鑄錢物力富盛嘗試貢士  
高祖入關詩頗有窺覲中土之意後因失地頗躁憤惡其大臣  
宋齊丘陳覺李徽吉皆殺之建隆元年宋祖受命遣使以書諭  
景其將校周成等三十四人相繼來降景遣使貢銀絹賀登極  
又貢銀賀平澤路還京又貢金銀器羅綺絹匹遣禮部郎中龔  
慎儀貢乘輿服御物每歲冬正端午長春節皆以土產珍異金  
銀器用綉帛片茶爲貢上皆御前殿曲宴以寵之景生日亦遣  
使賜金幣羊馬橐駝以爲常上親征李重進駐蹕廣陵復遣左  
僕射嚴續犒師子蔣國公從鎰朝行在所又遣戶部尚書馮延  
魯貢金買宴并伶官作樂上壽貢金銀器金玉鞍勒銀裝兵器

及錢銀綾絹皆如常數宋祖亦厚賜之既平揚州詔習馬舫戰艦於京城之南池景懼有小臣杜著頗辭辨僞作商人由建安渡來歸彭澤令薛良坐事責授池州文學亦挺身來奔獻平南策景聞之益懼太祖命斬著於市配良隸廬州景乃安終以國境蹙弱不遑寧二年遷都洪州宋遣通事舍人王守正持節撫之俄而景薨年六十四遣表來上廢朝五日遣使弔祭贈賻第六子煜立遣其臣馮謐奉表願追尊帝號許之乃謚爲明道崇德文孝皇帝廟號元宗陵號順陵煜字重元初名從嘉少聰悟喜讀書屬文工書畫知音律初封安定郡公累遷諸衛大將軍副元帥封鄭王景始嗣位以弟齊王景遂爲元帥居東宮燕王景遂爲副元帥就昇柩前盟約兄弟相繼中外庶政並委景遂參決長子冀爲東都留守後又立景遂爲太弟景遂爲元帥

封齊王冀副元帥封燕王鎮京口周師征淮吳越圍常州皆冀部將敗之景達屯濠州兵舁遁還後因割地出景遂爲洪州元帥封晉王景達撫州元帥立冀爲太子數月卒諡曰文獻從嘉進吳王建隆二年立爲太子監國其秋襲位居建康改今名立母鍾氏爲聖皇后妻周氏爲國后封弟從善韓王從益鄭王從謙宜春王從虔昭平郡公從信文陽郡公長子仲寓清源公仲儀宣城公大赦境內遣戶部尚書馮謐上表貢金銀器紗羅綵綵且陳紹襲之意宋祖詔答不名自是朝廷凡有喪葬及出師克捷嘉慶之事必遣使弔祭犒師修貢煜母妻喪亦遣使弔祭乾德元年煜上表乞呼名不許詔諸軍親屬凡在江表悉令渡江以江南荐飢特弛舊禁許諸州民過江貿易及諸監鹽場亭戶緣江採捕遣使獻銀并龍鳳茶酒器會郊祀屢遣弟從謙從

善奉珍寶器用金帛爲貢其數皆倍於前嶺南平煜懼上表改  
唐國主爲江南國主唐國印爲江南國印許詔書呼名貶損制  
度下書稱教改中書門下省爲左右內使府尚書省爲司會府  
御史臺爲司憲府翰林爲文館樞密院爲光政院降封諸王爲  
國公官號多所改易長春節別貢錢三十萬然以性驕侈悅高  
談好聲色喜浮圖不恤政事宰臣湯悅以下皆諛佞阿奉大事  
將去內史舍人潘祐上書極諫請誅悅等數十人煜收祐下獄  
自綏祐乃散騎常侍處常之子少介僻杜門讀書不交人事由  
秘書正字虞部員外郎史館修撰知制誥宋祖留從善京師不  
遣以爲泰寧軍節度使又貢米麥雖外示畏服修藩臣之禮  
而內實繕甲募兵潛爲戰備太祖慮其難制令從善諭旨使來  
朝煜不聽開寶六年饒賜以米麥賑濟七年秋復詔赴闕稱疾



不奉詔冬乃命曹彬潘美等與師致討煜聞惶懼遣從鎰及潘  
慎修來買宴資茶絹及金銀器用乘輿服物至則留於別館王  
師克池州破其衆二萬於采石磯擒僞龍驤都虞候楊收等獲  
歲賜馬三百匹及用樊若水策遣高品石全振往荆湖造黃黑  
龍船數千艘載巨竹紐自荆渚而下八作使郝守濟率丁匠造  
浮梁以濟師王師渡江若履平地煜初以爲兒戲語其臣張洎  
自載籍以來長江無爲梁之理乃委兵柄於皇甫繼勳置機事  
於陳喬張洎以徐溫孫元耦等傳詔每軍書告急多不時通王  
師傳城尚猶不知因登城見列柵於外旌旗徧野始大懼遂殺  
繼勳亟令朱令贇率上江甲士數萬連巨筏順流而下將斷浮  
梁未至爲劉遇所破又募勇士五千謀乘夜人乘一炬來襲官  
軍咸爲宋師所殲獲將帥悉佩符印宋太祖命李穆送從鎰還

以手詔促其降煜惑於左右之言猶豫不決王師破潤州煜危甚遣其臣徐鉉周惟簡奉方物懇求罷兵不許厚賜遣之彬屢督其清源郡公仲寓入覲將以十一月二十七日出是日城陷煜率其近臣迎拜以煜與宰相湯悅等四十五人一同露布上獻詔並釋之賜冠帶器幣鞍馬拜光祿大夫檢校太傅右千牛衛上將軍封違命侯妻封鄭國夫人從姪從謙左右領軍衛從度從信左右監門衛皆大將軍仲寓左千牛衛後領郢州刺史在郡十年爲政寬簡部內甚治姪仲遠右驍衛仲興季操左右武衛仲偉右屯衛仲康右領軍衛仲宣監門衛皆將軍仍各賜宅一區太宗卽位加特進封隄西郡公嘗自言貧詔增給月俸仍賜錢三百萬上幸崇文院名問卿在江南好讀書歸朝來頗讀書否煜頓首謝卒年四十二廢朝三日贈太師追封吳王從

善字子師後改右神武大將軍又推恩將佐以江直木爲司門員外郎惟光習右千牛衛將軍于再與右千牛衛中郎將餘各有差

冊曰克己爲仁帝嘗內愧江南何罪一言已盡所以古人伐國不問

王建字光圖許州舞陽人生而隆眉廣額狀貌甚偉少無賴屠牛盜驢販鹽爲姦里人呼爲王八由忠武軍卒稍遷隊將黃巢亂忠武軍將鹿晏弘以兵八千屬楊復光分爲八都都將千人建與晏弘皆爲都頭復光死晏弘率八都西迎駕所過剽略至興元逐節度使牛勣自稱留後僖宗卽以爲節度使命建等皆領屬州刺史已而晏弘擁衆東陷陳許建與晉暉韓建張造李師泰等各率一都入蜀僖宗得之大喜號隨駕五部以屬觀軍

容使田令孜養爲己子帝還長安遂命將神策軍備宿衛光啓元年出幸鳳翔二年再幸興元建皆爲清道使負玉璽從行至當塗驛李昌符焚棧道建控上馬冒煙焰中過宿坂下夜枕建膝以寢既覺涕泣解御衣賜之後令孜貶出建爲壁州刺史始招集亡命及溪洞部落有衆八千以攻閬州執刺史楊行遷又攻利州刺史王拱棄城走西川節度陳敬瑄患之以問令孜答曰吾兒也使人招之建聞名大喜因至梓州與顧彥朗有舊卽以家屬託彥朗選精銳二千竟赴成都期見陳公求得一鎮行至鹿頭關敬瑄悔使人止之建大怒與諸將斷髮誓作賊卽引衆攻破關取漢州彥朗聞之出兵助建軍于學射山敬瑄遣將句惟立逆擊而敗遂攻彭州復遣眉州刺史山行章將兵五萬屯新繁建又敗之掠獲萬餘大發兵七萬益行章與建相持於

濠陽新都百餘日昭宗遣左諫議大夫李洵宣諭和協各昭罷  
兵彥朗因爲建求旌節且請以大臣鎮蜀朝命宰相韋昭度節  
度西川分邛蜀黎雅四州爲永平軍拜建節度使敬瑄不受代  
帝卽命昭度將彥朗等兵討之以建爲招討牙內都指揮使師  
久無功川民困弊建說昭度曰唐室多故東方諸鎮兵接畿甸  
公當歸相天子靜中原以固根本若此下國不足以留公昭度  
遲疑未決建遣軍士擒其親吏於軍門櫛而食之入白軍士饑  
須此爲食昭度大恐卽留符節與建東還京師建卽以兵阻絕  
劍門行章屯廣都擊敗走之遂下彭州已而資簡戎茂喜邛諸  
州聞之皆殺刺史以降建急攻成都令孜登城呼曰老夫與公  
相厚何嫌而至此建口軍容父子之恩心何敢忘然奉天子命  
討不受代者豈無因而至令孜夜入建軍授以節度觀察印

明日敬瑄開門迎建入城以張勅爲都虞候戒軍士無犯令殺  
百人而後定大順二年十月昭宗授建檢校司徒成都尹劍南  
西川節度觀察處置兼雲南八國招撫等使建復欲併東川未  
有以發會顧彥朗卒唐遣宦者宗道弼賫東川旌節賜其弟彥  
暉絳州刺史常厚執道弼以攻梓州建聞遣李簡等討厚敗之  
厚以旌節還道弼歸于彥暉乾寧二年復遣將王宗濬攻彥暉  
十二月敗之于楸林斬其將羅璋遂圍梓州三年五月昭宗遣  
宦者袁易簡詔建罷兵還成都黔南節度使王肇以其地降四  
年遣王宗侃宗阮等出陝取渝瀘州五月復自將攻東川昭宗  
仍遣李洵宣諭建不奉詔責授南州刺史徙李茂貞西川節度  
使茂貞拒命乃復建官爵冬十月攻破梓州彥暉自殺其將顧  
彥瑤死之用宗濬爲東川留後俄授節度使建始有兩川之地

時茂貞兼據梁洋秦隴兵數來侵天復元年梁討茂貞兵圍者  
經年建造宗滌將兵五萬聲言迎駕實攻興元執節度使李繼  
業而武定節度拓拔思敬亦以其地降之因併有山南西道適  
荆南成汭死趙匡凝襲據之建乘其間攻下夔施忠萬四州三  
年八月唐封爲蜀王四年唐遷都洛陽改元天祐與隔絕不知  
仍稱天復六年取歸州併有三峽七年梁滅唐遣使者來諭拒  
而不納馳檄五鎮會兵討梁是歲正月巨人見青城山諸州皆  
言鳳皇黃龍甘露白鹿白雀龜龍之瑞秋九月己亥卽皇帝位  
改元武成封諸子爲王以王宗吉爲中書令韋莊左散騎常侍  
判中書門下事唐襲爲樞密使鄭審御史中丞張格王鉞翰林  
學士周博雅成都尹蜀恃險而富富唐之末人士多依建以避  
亂建雖起盜賊而爲人多智詐善待士當僭號時所用皆名臣

世族莊見素之孫格濟之子也。建常曰：吾爲神策軍將時，見天子夜召學士，出入無間，恩禮親厚，非將相可比。故待格等恩禮尤異。其餘宋玘等百餘人，並見信用。元年正月，南郊大赦，加恩宗吉爲太師，宗吉本姓甘，自幼掠得養，以爲子，以創業功多，累遷武信軍節度使。襲本舞僮，見幸宗吉，易之，雖爲樞密，猶呼名。襲內恨外陽謹奉，後建諸子長，宗吉心不自安，與鄭憲等謀求爲大司馬，總兵權。建疑不允，襲因激怒建言，人心服其威望，宜卽與之建，心益忌。及入奏事，復請不已，叱衛士撲殺之，并賜鴆。死六月，立次子宗懿爲太子，判六軍，改名元曆。時年十七，創天武神機營，開永和府，置官屬。建加尊號英武睿聖皇帝。二年，頒永昌曆。三年十二月，大赦，改元永平。自建得山南地，茂貞勢孤，求與建和，娶建女爲婦，因求故地。建怒，不與命。宗侃、宗佑、宗賀



唐襲三面攻嶮戰于青泥宗侃收績退保西縣爲茂貞所閉建  
自將擊之岐兵解去還至興元復加尊號光孝二字明年又加  
神功文德四字使尚食歐陽柔治第得令夜所埋唐傳國璽寶  
之梁遣光祿卿盧杞來聘推建爲兄建以元曆年少任重以記  
事戒之令一切効其所爲命道士廣成先生爲之師元膺爲人  
殺衆齒齒多林藝能射中錢孔嘗自抱書毬都馬上馳而射之  
無不中以是數輕唐襲建懼其交惡罷襲爲興元節度使元膺  
廷疏其過嫌襲益深會七夕太子置酒召諸大臣而集王宗翰  
樞密潘峭學士毛文錫俱不至元膺怒曰建將罪之襲乘間譏  
曰太子謀作亂召諸將并王欲以兵錮之然後舉事建疑之襲  
請召屯營軍入衛元膺聞襲召兵以爲誅已乃與伶人安悉香  
軍將喻全殊率天武兵自衛遣人持峭及文錫笞之兩於其家

召大將徐瑤常謙率兵拒襲戰于神武門襲中流矢墜馬死建  
遣王宗賀以兵討之元膺兵敗爲衛兵所殺建有子十一尚存  
衛王宗仁趙王宗紀幽王宗格韓王宗智莒王宗特信王宗傑  
魯王宗鼎興王宗澤薛王宗平特以宗格貌類已宗傑最賢欲  
於兩人擇立之鄭王宗衍最幼其母徐賢妃與妹淑妃皆以色  
進專房用事建老昏薨妃與宦者唐文展干預外政倚文展判  
六軍事無大小皆決之乃教相士言衍相最貴又諷宰相張恪  
贊成由是立宗衍爲太子開崇賢府置官屬後更曰天策府四  
年荆南高季昌侵巫山遣嘉王宗壽敗之于瞿唐八月殺黔南  
節度使王宗訓冬南蠻攻掠界上遣夔王宗範擊敗之于大渡  
河五年于龍興宮起壽昌殿繪建像又起扶天閣蓄諸功臣像  
十一月大火焚其宮室遣宗壽等攻岐取秦鳳階成四州至大

散關梁叛將劉知俊舉族來歸通正元年遣王宗綰等率兵十二萬出大散關攻岐取隴州八月起文思殿以毛文錫爲學士購羣書實之大赦改元更國號漢天漢元年殺劉知俊十二月又改明年元曰光天復國號蜀時建已病大臣問者皆不得入宗弼等排間言文晟欲爲變乃殺之建以老將大臣多許昌故人必不爲太子川思擇人未得疾亟乃以宦者宋光嗣爲樞密使判六軍卒年七十二太子立更名衍衍字化源生而方頤大口垂手過膝顧目見耳頗知學問能爲浮艷之詞既立改元乾德諡建曰神武聖文孝德明惠皇帝廟號高祖陵曰永陵正室周氏號昭聖皇后後數日亦卒因尊其母賢妃爲皇太后淑妃爲皇太妃兩宮以教令實官自刺史以下入錢多者得之起邸店以奪民利衍年少荒淫委其政宋光嗣光葆景潤并澄王

承休歐陽晃田魯條等而以韓昭潘在迎顧在珣嚴旭等爲狎  
客起宣華苑內建重光太清延昌會真四殿清和迎仙二宮降  
眞蓬萊丹霞怡神四亭并飛鸞閣瑞獸門與諸狎客婦人日夜  
酣飲宗壽等因九日宴以社稷切諫言訖流涕昭等以爲酒惹  
其慢言嘲之時蜀人競爲小帽僅覆其頂俛首卽墮謂之危腦  
帽衍以爲不祥禁之乃更好戴大帽每微服出游民間以大帽  
識之因令國中皆戴大帽又好裝尖巾其狀如錐而後宮皆戴  
金蓮花冠衣道士服酒酣免冠其髻髻然更施朱粉號醉粧國  
人皆効之嘗與兩宮游青城山宮人衣服皆畫雲霞飄然望之  
若仙因自作甘州曲述其仙狀上下山谷每自倡歌而使宮人  
皆和乾德元年正月南郊大赦加尊號聖德明孝皇帝二年冬  
北巡至于西縣旌旗戈甲連亘百餘里其還自閬州浮江而上

龍舟黼舸照耀江水所在供億人不堪命五年起上清宮塑王  
子晉像尊爲聖祖至道玉宸皇帝塑建及衍像侍立左右正殿  
則塑玄宗皇帝及唐諸帝備法駕而朝之六年因宦者以通王  
承休妻嚴氏有絕色出承休爲天雄軍節度使天雄軍秦州也  
值唐莊宗滅梁遣李晟聘蜀衍與俱朝上清見其人物富盛簾  
帷珠翠夾道不絕衍驕淫縱侈歸乃獻伐蜀策明年改元咸康  
又好畋獵徧幸彭漢諸山復因嚴氏故以十月幸秦州羣臣切  
諫不聽行至梓潼大風發屋拔木太史曰此貪狠風也當有敗  
軍殺將居數日遂爲郭崇韜所敗宗壽許州民家子建以同  
姓錄之爲人好學工琴奕性恬退喜道術事建時爲鎮江軍節  
度使衍以爲太子太保奉朝請以煉丹養氣自娛後爲武信軍  
節度使唐師伐蜀所在迎降魏王繼岌以書招之宗壽不聽聞

衍已銜璧大勳從之東還至洛陽得見衍泣下霑襟曰早從王  
言豈有今日後乃亡入熊耳山天成二年出詣京師上書求衍  
宗族十八喪葬之明宗嘉其忠以爲保義軍節度行軍司馬封  
衍順正公許以諸侯禮葬

冊曰古稱仁瑞莫非由人瑞至而昌斯乃足神吁嗟麟兮  
反袂何因

孟知祥字保胤方立從子叔遷以澤潞降梁父道獨留事晉以  
女妻晉王弟克寧知祥又妻克讓女瓊華公主初爲左教練使  
拜中門使中門之職參管機要前此吳珙張虔厚皆以罪誅知  
祥懼求改職莊宗命薦代者因薦郭崇韜自代崇韜德之知祥  
遷馬步軍都虞候轉太原尹北京留守崇韜伐蜀臨行言於莊  
宗曰卽臣等有功擇賢帥守之無如知祥者已而唐兵破蜀莊

宗遂以知祥爲成都尹劍南西川節度使名至京城有司盛供帳多出內府珍奇諸物以宴勞之酒酣語及時昔以爲笑樂莊宗嘆曰吾老矣繼炭孺子可惡能爲吾平定兩川吾憶先帝時疆土侵削僅保一隅豈知今日奄有天下九州四海奇珍異產充牣府庫因指以示知祥吾聞蜀土之富無異于此以卿親賢故以柑休同光四年正月戊辰知祥至成都崇韜已死遣大將李仁罕等擊破康延孝叛兵獲其將李肇侯弘實及兵數千以歸旣而莊宗崩繼岌亦死明宗入立知祥陰有王蜀之志訓練甲兵益置義勝定遠驍銳義寧飛掉等軍七萬餘人分將以仁罕趙廷隱張知業等冬加知祥侍中遣太僕卿趙季良齎官告以賜因命制置兩川征賦初繼岌班師時知祥率成都富人及王氏故臣家錢六百萬緡犒軍其餘者猶二百萬至是督令轉

送京師知祥怒不奉詔然與季良有舊遂留之以爲節度副使  
事無大小皆與叅決三年唐徙季良果州團練使安重誨以李  
嚴監成都軍嚴前常獻策伐蜀故蜀人惡之掌書記母昭裔及  
諸將吏皆請無納知祥盛兵以待冀嚴懼而不來嚴以天成二  
年正月至成都方出詔以示知祥曰客將王彥銖執下斬之鳳  
翔節度使李從嚴奏反狀請留其家屬而明宗欲懷以恩信乃  
遣客省使李仁矩送其家及子利等歸蜀以慰知祥唐師伐荆  
南詔出兵三千戍夔州久之知祥請罷戍詔不許遂諷其將毛  
重威以衆潰歸明宗有事南郊賁助禮錢百萬知祥覺其謀欲  
困已辭不肯出僅獻五十萬安重誨久疑知祥有異志表以武  
虔裕爲綿州刺史夏魯奇領武信軍各帥精兵赴鎮以爲牙隊  
知祥懼謂唐將致討乃用季良策與東川董璋合縱以拒朝廷



連表請罷所遣節度刺史等。明宗優詔慰諭之。長興元年二月，郊禮畢，加中書令。九月，董璋反，知祥因應聖節，開宴東北，望再拜，伏咽泣下，沾襟。士卒皆爲歔歔。明日，亦遂稱兵。明宗下詔削奪官爵，命石敬瑭爲都招討使，魯奇副之。知祥遣仁罕等將兵三萬會璋攻遂州。別遣侯弘實將四千人助守東川。又遣張武下峽取渝州。唐師攻劔門，殺璋守兵三千人。之璋來告急。知祥大駭，遣廷隱分兵萬人以東，已而聞唐軍止劔門，不進。喜曰：「若使急趨東川，則遂州圍解，吾勢且沮，而兩川搖矣。」今吾乃知其易與爾。」十二月，廷隱大敗敬瑭于劔門，武取渝州，病卒，代以其副袁彥超。復取黔州。二年正月，仁罕克遂州，魯奇死之，遣人馳首以示敬瑭。乃班師利州。李彥珂聞敗，亦棄城走。仁罕進攻夔州。刺史安崇阮亦走。所在守將皆不能固。明宗憂之，謂致知祥

等反山重誨失策再遣西川進奏官蘇愿軍將杜紹本招諭知祥具言家屬在京師者皆無恙知祥聞之邀璋欲同謝罪璋因子孫見殺不聽又遣觀察判官李昊說璋璋益疑爲賣已因發怒以語侵昊昊還勸知祥攻之璋先襲破漢州知祥自將往擊遣廷隱率兵三萬陣鷄距橋得璋降卒衣以錦袍使持書招璋璋言事已及此尚可悔耶軍士皆欲速戰謀曰無徒隳我於日兩軍始交偏將張守進來降知祥乘之璋遂大敗知祥并有東川以趙季良爲武泰軍李仁罕武信軍趙廷隱保寧軍張知業寧江軍李肇昭武軍皆爲留後因請知祥稱王以墨制行事議論未決先是知祥妹孟氏因克寧死歸蜀其子瓌留事唐爲供奉官明宗遣瓌歸省其母因賜知祥詔書招慰之瓌還因上表請得封蜀王又請除季良等爲五鎮節度使其餘刺史以下得

自除授時瓊華已卒改封福慶公主封冊未至明宗爲發哀遣  
閤門使劉政恩爲宣諭使知祥始遣其將朱晃同政恩來朝四  
年二月癸亥加授檢校太尉兼中書令管內觀察處置統押近  
界諸蠻兼西山八國雲南安撫制置等使仍遣工部尚書盧文  
紀冊封爲蜀王餘皆如所請十一月明宗崩明年閏正月僭位  
國號蜀以季良爲司空同平章事王處回爲樞密使李昊翰林  
學士三月山南西道節度使張虔劉武定軍節度使孫漢韶皆  
以其地歸附四月改元明德因宴勞虔釗等手綬不能舉觴亟  
立第三子杲爲皇太子權監軍國遂卒諡爲文武聖德英烈明  
孝皇帝廟號高祖陵曰和陵 瑋少爲李讓家僮因得事梁太  
祖以軍功爲指揮使末帝遣瑋攻下澤州卽以爲刺史梁亡事  
唐莊宗爲邠寧節度使亦與崇韜善伐蜀以爲行營右廂馬步

軍都虞候軍事大小皆與參決蜀平就拜劔南東川節度使安重誨信言事者謂璋盡忠爲國欲倚之以圖知祥天成四年詔書責以貢助南郊禮物五十萬璋訴不肯出僅獻十萬其後使還者多言璋益橫肆倨慢無禮必有反謀重誨患之稍擇將吏爲刺史以精兵爲其牙卒分布諸州璋覺唐疑已且懼削地遂發兵反娶知祥女爲子婦以相連結遣將李彥釗扼劔門關爲七砦增置永定一關於關北凡唐戍兵東歸者皆遮留之逃者覆以鐵籠火炙之或剗肉釘面剖心而突長興元年攻陷閬州執李仁矩姚洪皆殺之事聞朝廷盡誅其家屬遣東川將劉澄西歸諭璋使自新不聽三年四月以兵萬人攻知祥戰于彌牟大敗走過金鴈橋麾其子光嗣使降以保家族光嗣哭曰自古豈有殺父而求生者乎寧俱就死因與俱走至梓州爲故陵州

刺史王暉所殺光嗣自縊傳其首于知祥

昶初名仁贊母李氏本莊宗嬪御以賜知祥生昶于太原初署  
兩川節度行軍司馬僭號授檢校太保同平章事崇聖宮使領  
鎮東川明德元年七月襲位二年尊母爲皇太后四年改元廣  
政因年少政事悉委大臣季良知業仁罕等皆知祥故人知祥  
在時寬厚多優容之遂驕蹇踰法務廣第宅奪人良田開發墳  
墓仁罕知業尤甚昶執而誅之虔回廷隱相繼致仕昶始親政  
置國朝堂以通下情時契丹方亂漢祖起并門中原蝗旱秦州  
節度使何建鳳州防禦使石奉頤俱以城降昶于是悉有王衍  
故地開貢舉行郊祀禮君臣益務齊縱十三年上尊號府文英  
武仁聖明孝皇帝十八年周世宗克秦鳳四州昶始懼放還所  
獲濮州刺史胡立致書于周稱大周皇帝自言家世邢臺願敦

鄉里之分世宗怒其無禮不答昶愈不自安乃于劒門夔峽多積芻粟增置師旅用度不足更鑄鐵錢禁境內鐵器置場鬻之以專其利立玄詰爲太子用王昭遠伊審徵韓保正趙崇勳等分掌機要母嘗語昶曰吾見莊宗跨河與梁軍戰又見爾父在并州捍契丹及入蜀定兩川當時主兵者非有功不授故士卒畏服如昭遠者出于微賤保正等皆世祿之子素不知兵一旦警急此輩何以禦敵高彥儔爾父故人秉心忠實多所諳練此可委任昶不能用及宋太祖下荆楚昶欲遣使朝貢昭遠等固止之時已有西伐意詔蜀邸吏將卒先在江陵者並給錢帛放還乾德二年昶遣孫遇楊獨趙彥韜至京師彥韜潛取昶與并州劉鈞蠟書以告太祖大喜曰吾用師有名矣卽命王全斌由鳳州路王仁贍副之劉廷讓由歸州路曹彬副之率禁兵三萬

諸州兵二萬分二路進討命遇等指畫江山曲折及兵砦戍守道里遠近畫爲一圖以授全斌等諭曰凡克城砦祇籍其器甲多糧悉以錢帛分給戍士兵至和遣昭遠崇韜保正李進等拒戰皆相繼就擒利大懼出金帛募兵以守劍門命玄喆爲元帥統之副以李廷珪張惠安皆庸懦無識玄喆尚攜姬妾樂器伶人晨夜嬉戲不恤軍政旌旗悉用文繡以錦綢其杠馱微雨恐濡濕悉令解去皆倒懸扛上雨止復施之識者已知其不吉至縣州間劍門已破遯歸東川所過焚廬舍倉廩而去和益惶駭問計于老將石斌對以宋師遠來勢不能久請聚兵固守以老之衆曰吾父子豐衣美食養士四十年今遇敵不能爲我發一矢若更固壘何人効命三年正月勢迫遣伊審徵齊降表言中外骨肉二百餘人有親年幾七十願同甘旨免賜睨離祖宗血

食望賜少延末援故事請封號全斌等受之遣康延澤先以百騎入城諭和恩信盡封府庫留三日而還和乃舉族與官屬由峽江而下至江陵宋遣皇城使竇思儼迎勞之四月至襄漢復遣使齎詔賜和與母茶藥呼爲國母不名將至又命晉王勞于近郊和率子弟素服待罪闕下太祖御崇元殿備禮見之賜襲衣玉帶金鞍勒馬金銀器錦綺絹各萬計母亦賜金銀器錦綺絹差少子弟官屬等襲衣金玉帶鞍勒馬車乘器幣有差又遣使分詣江陵鳳翔賜其家屬錢帛疾病者給醫藥卽日宴于大明殿先詔有司起大第右掖門外以待供帳悉備至是賜之官屬各以次就居翌日授開府儀同三司檢校太師給二鎮節度使俸餘官除拜有差凡七日而卒年四十七廢朝五日素服發哀于大明殿贈尚書令追封楚王諡恭孝贈葬官給其母不哭



以酒醑地祝曰。汝不能死社稷。食生取羞。吾所以忍死者。以汝在爾。今汝既死。吾何用生爲。因不食數日。亦卒。宋祖聞而傷之。賻贈加等。令鴻臚卿范禹偁護喪事。與昶俱葬洛陽。發奉義甲士千人護送。昶嗣位三年。專務奢靡。納方士房中術。多採良家子以充後宮。至用溺器以七寶飾之。他物稱是。副樞韓保貞切諫。不聽。會歲除。自題桃符曰。新年納餘慶。嘉節號長春。甫新正。遣呂餘慶知成都。聖節又名長春。太史先奏。焚惑犯積屍乃蜀分野。至是悉應。玄詰字遵聖。幼聰悟。善隸書。初封秦王。檢校太尉。同平章事。判六軍營。自書姚崇口箴刻諸石。昶賜以銀器。鄴綏後領武德軍節度使。兼侍中。歸宋爲檢校太尉。泰寧軍節度使。移鎮貝州。十餘年有治迹。太平興國初。復轉定州。加開府儀同三司。從平太原。就命爲鎮州駐泊兵馬鈐轄。征幽州。率所

部攻城西而會班師遣與藥可瓊等歸屯定州俄契丹入寇與諸將破之徐河以功封滕國公入爲左龍武統軍判右金吾街仗未幾知滑州淳化初病移知滁州卒年五十五贈侍中有子十五人隆記隆詒隆說隆詮並進士及第 立珏初封襲王檢校太保少端敏侍射連中的昶奇之賜錢三十萬時方就學選起居舍人陳鄂爲敎授倣唐李濟蒙求高測韻對爲四庫韻對四十卷以獻益賞以錢後領閬州保寧軍節度使加太傅歸宋爲千牛衛上將軍遷右神武統軍代立詒判金吾街仗太平興國九年出爲宋曹兗郛都巡檢使改右屯衛上將軍出知滑州卒 弟仁贊字忠美初爲左威衛將軍封雅王檢校太尉領閬州保寧軍節度使奉降表詣宋召見廣德殿賜襲衣玉帶鞍勒馬授左神武統軍母憂起復領大同軍節度西京都巡檢使卒

贈太子太師 仁裕字鳴謙封彭王領黔州武泰軍節度使加  
太尉歸宋授檢校太傅右監門衛上將軍遷右羽林軍卒贈太  
子太傅 仁操初爲右領軍衛將軍封嘉王檢校太傅領果州  
永寧軍節度管侍射桅子固連中的三加太尉好崇奉釋氏深  
究其理歸宋授右監門衛上將軍遷右龍武統軍卒 伊審後  
字中圖并州人父延瓌隨知祥入蜀妻以崇華公主歷陵嘉眉  
三州刺史審徵自歿以孝聞母病割股肉啖之以蔭歷蜀州刺  
史雲安權鹽使代高延昭爲通奏使知樞密院事侵秦鳳命檢  
校城砦俄領武泰軍節度使子崇度復尚主改寧江軍節度使  
同平章事歸宋授靜難軍節度使乾德六年移鎮延安開寶末  
入爲右屯衛上將軍太平興國二年判右金吾衛仗卒 韓保  
正字永吉潞州長子人父昭輝從入蜀署珍州刺史保正初爲

押衙後兼豐德廣義庫使領眉州刺史爲副樞密復刺漢州歷  
宣徽北院南院雄武寧江二軍節度使復領度支爲左衛聖步  
軍指揮使遷奉鸞肅衛馬步軍都指揮使以其子崇尚主尋聞  
荆南高繼冲納土以爲峽路制置使屯夔州仍檢校太尉兼侍  
中聞宋來伐改山南節度興元武定緣邊諸砦屯駐及全斌等  
至畏懼不敢出遂棄興元保西縣遣人依山背城結陣以自固  
爲史延德所破以麾下邂逅擒之全城驛置闕下太祖召升殿  
勞問賜袍笏金帶茵褥鞍馬未及命官而卒贈右千牛衛上將  
軍 王昭遠成都人幼依東郭僧智誨爲行童知祥飯僧見之  
悅其聰慧令侍左右時和方就學留給事嗣位以爲捲簾使典  
茶酒庫會樞密使王處回出知梓州飛以樞密事權太重改爲  
通奏使以昭遠及普豐庫使高延昭領之俄爲眉州刺史領永

平軍不數月復代李繼勛爲昭武軍節度使歲餘改寧江軍未  
幾加平章事兼領山南西道昭遠好讀兵書自比諸葛亮兵始  
發成都廷臣餞之昭遠手執鐵如意指揮人言曰是行何止克  
敵當率此二三萬雄而懋少兒取中原如反掌爾及宋師破劔  
門懼而股慄趙崇韜布陣將戰昭遠據匡牀不能起俄崇韜敗  
走投東川匿倉舍下悲咽流涕爲追騎所執送闕太祖釋之授  
左武衛大將軍廣南平卒使交趾卒 趙廷隱太原人從入蜀  
卒勇有智略麾下無及之者以破董璋功命總親軍爲衛聖馬  
步軍都指揮使遷僞太師中書令封宋王卒諡忠武子崇韜驍  
果有父風利卽位初置四番殿直令仁罕子繼宏季良子元振  
知業子繼昭洪寶子令欽及崇韜分爲都知領之後遷客省使  
周世宗克秦鳳將入蜀境崇韜拒却之歷左右衛聖步軍都指

揮使子文亮尚主加領洋州武定軍節度緣邊諸砦都指揮使  
爲宋師所擒 高彥儔太原人宣威軍使暉之子從入蜀爲軍  
校歷昭武軍監押利遷邛州刺史改馬步軍使漢兵入大散關  
克安都砦彥儔以所部先進盡銳追擊復其砦而還加領趙州  
刺史俄爲右驍銳光聖二馬軍都指揮使真拜源州武定軍節  
度使周世宗遣向訓攻鳳州親令出兵未至潰歸不罪以爲右  
水鑾肅衛都指揮使改功德使宋師將入命守夔州彥儔欲堅  
壁以待監軍武守謙不從時劉廷讓頓兵白帝廟西遣騎將張  
廷翰等引兵與守謙戰于猪頭舖守謙敗走廷讓率大軍繼至  
彥儔率所部出戰廷翰等已乘城而入判官羅濟勸令單騎歸  
成都泣曰我昔失天水今復不能守夔縱不忍殺我何面目見  
蜀人哉濟又勸其降曰老幼百口在成都若一身偷生舉族何

負今日止有死耳。卽解符卽授。濟具衣冠望西北再拜。登樓縱火自焚。廷讓收其骨煨燼中。以禮葬之。蜀亡死者惟彥修一人。幸寅遜蜀人初仕爲茂州錄事參軍。和好擊毬上。章極諫深被賞納。遷新都令。拜司門郎中。知制誥中書舍人。出知武信軍。尋加史館修撰。改給事中。拜翰林學士。加工部侍郎。判吏部三銓事。領簡州刺史。歸宋。授右庶子。嘗上疏諫。獵太祖嘉之名。見賜帛。開寶五年爲鎮國軍行軍司馬。年九十餘卒。李昊字穹佐。祖乾右建州刺史。父羔容。嘗從事吳生於關中。遇唐末亂。避地奉天。岐軍攻城。父及弟妹皆死。昊與母得免。獨流寓新平。爲岐帥劉知俊所獲。與語甚器之。翼于門下。妻以女。知俊歸蜀。領遂州武信軍節度使。以昊爲從事。每出師。令主留務。知俊被殺。罷職。王衍時授彭州導江令。歷中書舍人。翰林學士。造心脅張。

金王彥問道迎其母至青泥嶺撫首號慟哀感行路衍亡入洛  
明宗命樞密兵部郎中從孟知祥辟爲推官遷掌書記累擢禮部  
侍郎翰林學士和立領漢州刺史遷兵部出知武德軍府加承  
旨進尚書左丞拜門下侍郎兼戶部尚書同平章事判度支監  
修蜀史因請置史官以給事中郭廷鈞職方員外郎趙元拱爲  
修撰雙流令崔崇構成都簿王中孚爲直館又進左僕射圖像  
於真容院殿內自知祥領蜀凡章奏書檄皆出吳手集爲百卷  
曰經緯略修永寶錄四十卷母憂起復修前蜀書仍與元拱中  
孚及諫議喬諷給事中馮侃辛寅遜知制誥賈玄珪少卿郭微  
郎中黃彬同撰成四十卷上之封趙國公俄加司空領遂州武  
信軍節度使加宏文館大學士修奉太廟禮儀使選其子孝連  
尚鳳儀公主累遷太常少卿資州刺史長子孝達給事中四孫



遷授太子司儀郎舍人並賜緋入宋拜吳工部尚書孝逢膳部  
郎中孝連將作少監後至司農少卿俄聞家屬至夸陵妻死悲  
愴成疾而卒凡前後仕蜀五十年位兼將相秉利權歲入鉅萬  
奢侈尤甚後堂妓妾曳羅綺常數百人蜀人以王衍孟昶降表  
皆其所爲潛署其門曰世修降表李家孫德隣國子博士德隣  
進士及第母守素字表淳河中龍門人父昭裔前蜀僞相以  
太子太師致仕守素任僞秘書郎累遷戶部員外知制誥中書  
舍人工部侍郎出爲雲安權鹽使拜工部尚書代父判鹽鐵度  
支俄領彭州刺史奉親勤至雖隆暑暑歸必朝服執節以申昏  
定之禮入朝授工部侍郎俄坐奪官開寶初起爲國子祭酒征  
河東命權知趙州平嶺表移知容管諸州水陸轉運使卒在蜀  
好藏書令門人勾中正孫逢吉校文選初學記白氏六帖鏤板

齊至宋朝祥符九年子克勤上其板補三班奉職克溫賜緋次  
子克恭尚昶女鑾國公主仕爲光祿少卿歸宋至左監門衛將  
軍 歐陽昶華陽人父珣通泉令昶少事王衍爲中書舍人隨  
至洛陽補秦州從事知祥復以爲中書舍人拜翰林學士知貢  
舉判太常寺選禮吏二部侍郎領陵州刺史加承旨拜門下侍  
郎兼戶部尚書平章事監修蜀史嘗擬白居易諷諫詩五十篇  
以獻昶嘉美資以銀器錦綵歸宋爲右散騎常侍俄充翰林學  
士分司西京卒生平性儉素雅善長笛宋太祖常召於便殿令  
吹數曲中丞劉溫叟叩殿門切諫以爲禁署之職代主絲綸不  
可作伶人之事自是不復召太祖因嘆曰孟昶君臣溺于聲樂  
迺至宰司尚忍習此其他可知此其爲我擒也